

ዮሃንስ አጁታ

ግዱዋ ኤርሱዋ

ዮሃንስ አጁተይ ጣፌትዶ ዎዴ፥ አመንዮ አሰት ዩሱስ ክርስቶስ በንተው ጎደ አትድ፥ ጌሸቴተን ዴእዶ ግሸው፥ ኤተ ሜቶይኔ ዋዬኔ ገክዶ ዎዴ፥ ጣፌ ዉድድ ጤልዶ ዋነ ዮሆይ ነበብዮጌቱ ህድተይ ኩሜተ ግደናደን፥ ኤተ ምንቴተናሰኔ በንተነ ገክደ ዩዴታኔ ሜቱዋ ግዶን በንተ አመኑወን ምነናደን፥ ኤተ ምንቴተናሰ።

መጣፋ ግዶን ደርዮ በገይ ደሮኔ ካል ካልድ ቆንጭደ አጁተተ አይቅዳጋ። አጁተት ሄ ለይተን ዴእደ አሳስ ጌልያጌተ። ሽን ሀራቱስ ጡረ ግድድ ገምእያጌተ። ኤት ሺቂድከ ስእልያ ቤእዮጋደን ቆንጭ ሃሰዮን ሺቅዶሶነ። መዘመርያ አዝማቹ ስም ስምድ ዩጤትዮጋደን፥ ሀ መጣፋ ግዶን ዴእየ ሁጲ ዮሆት ዱመ ዱመ አጁተቱ በጋረ ዱመ ዱመ ሜረን ስም ስምድ ሺቅዶሶነ። ሀ መጣፋ ጤልያገን ዱመ ዱመ ቆፊይ ዴእኮኔ አዮ ጉልአ ቆፊይ ቆንጭ። ሄጌኔ፥ «ጦሰይ ጎደ ግድደ ክርስቶስ በጋረ ናአንቴነ ሀኖተን፥ በ ሞርኬተ፥ ሴጣናረከ ገትድ፥ እስቶን ዉርሴተ ጦኑዋ ጦነነ። ጦኑዋ ፖልዶጋፔ ጉይየን ባስ አመኔትድ ዴእደ፥ በ በገተ ኦረተ ሰሉዋኔ ኦረተ ሰአ አንጁዋ ላትሰነ» ያግዶጋ።

1 ኤሱውን ሀነነው ቤስያባ በ አሽከረተ ቤሰነ መለ፥ ጦሰይ ዩሱስ ክርስቶስዮ እምዶ አጁተይ ሀጋ፤ ዩሱስ በ ኪተንቻ ኪትድ፥ ሀ አጁታ በ አሽከራ ዮሃንስ ኤርሲስ። 2ዮሃንስ ጦሳ ቃላ፥ ዩሱስ ክርስቶስ መርከቱታኔ በ ቤእደ ኡበባ መርከቲስ። 3ሀ መጣፋ ነበብዮ ኡረይ አንጅትዳጋ፤ ቀስ ሀ ሀነነባ ዮትዮ ቃላ ስይያጌትኔ ሀ መጣፊን ጣፌትዳጋ ናግያጌት አንጅትዳጌተ፤ አይስ ጊኮ፥ ዎዴ መተቲስ።

እሰየን ዴእየ ላፑን ዎስ ኬተቱስ ኪቱትደ ሰሮታ

4ታን ዮሃንስ፥ እስያ ቢተን ዴእየ ላፑን ዎስ ኬተቱዮ ያገይስ፤ ከሴ ዴእየ ጦሳፔ፥ ሀእከ ዴእየ ጦሳፔ፥ ስንተፔከ ያነ ጦሳፔ፥ ቀስ አ ከዎታ አራታ ስንተን ዴእየ ላፑን አያነቱፔ፥ አሮ ኬሀቱተይኔ ሰሮቱተይ እንቴዮ ግዶ። 5ቀስ ሀይቁዋፔ ኮይሮ ዴንድደ ነአፔ፥ ሰአ ከዎተ ሃርዮ

1:4 ኪሳ 3:14፤ አጁ 4:5

አመኔትደ መርካፕ፡ ዩሱስ ክርስቶስ፤ አሮ ኬሀቴተይኔ ሰሮቴተይ እንቴዮ ግዶ።

እ ኑ ሲቂስኔ ቀስ ኑ ነገራ አይሌቴታፕኸ በ ሱተን ኑ ኬሲስ።
6ኑን በ ጦሳዮኔ አዋዮ ኦተነ መለ፡ እ ኑ ከዎቴተኔ ቂሴተ ኦቲስ፤ አዮ ሜርናፕ ሜርና ገከናስ ቦንቾይኔ ዎልቀይ ግዶ። አምንእ።

7ቤእቴ፡ ዩሱስ ሻራረ ዩስ፡ አሰይ ኡብይ፡ ሀረይ አቶ፡ አ ጨድዳጌትከ አ ቤአነ፤ ሰአን ዴእየ አሰይ ኡብይ አፕ ዝላለነ። ሄጌ ቱመ። አምንእ።

8ከሴ ዴእያጌ፡ ሀእከ ዴእያጌ፡ ስንተፕኸ ያነ ጎደይ፡ ኡባፕ ዎልቃመ ጦሰይ፡ «አልፈይኔ አሜገይ ተነ» ያጌስ።

ክርስቶስ አጁተን ቆንጭዶጋ

9ታን ዮሃንስ፡ እንቴ እሸይ፡ እንቴናረ ዩሱስ ክርስቶስ ዋይያኔ አ ከዎቴታ ቀስ አ ደንደያ እስፕ ሻክያጌ፡ ጦሳ ቃላ ዮትዶ ግሸውኔ ዩሱሰባ መርከትዶ ግሸው፡ ፓጥሞ ግዮ ሀሩሩውን ዴአስ። 10ጎዳ ገለሰን ታን ጊሸ አያነን ኦሄታስ፤ ታን ታፕ ጉዩረ መልከተ ዋሱዋ መለ ግተ ጩንጉርሳ ስያስ። 11ሄ ጩንጉርሰይ ተነ፡ «ኔን ቤእዮጋ መጣፈን ጣፈ፤ ጣፈደ እስየን ዴእየ ላፑን ዎስ ኬተቱዮ፡ ኤፍሶነ፡ ሰምርኔስ፡ ጴርጋሞነ፡ ትያጥርነ፡ ሰርዴስ፡ ፕላዴልፍያ፡ ሎዶቅያ ዎስ ኬተቱዮ ዩደ» ያጌስ።

12ታን ታዮ ዮትየ ጩንጉርሳ ቤአነው ጉዩ ስማስ፤ ስመደ ጦምፕያ ዎትዮ ላፑን ዎርቀ በለተ ቤአስ። 13ሄ በለቱ ግዶን አሰ ነአ ምለትያጋ ቤአስ፤ አዱስ አፈላ በ ቶሁዋ ገት ማይድ፡ ዎርቀ ደንጨውን በ ትራ ዩሽ አትድ ቀቺስ። 14አ ሁጴኔ አ ሁጵያ ብናነይ ቦተ ዶርሰ እክሴኔ ሸቸ ምለቴስ፤ አ አይፊከ ተመ ለጮ ምለቴስ። 15አ ቶሆይከ ጮጭዮ ተመን ሴርድ ጳልየ ነሃሴ ግዮ ብረታ ምለቴስ፤ አ ጩንጉርሰይከ ግተ ሻፋ ጉንታ መለ። 16እ በ ኡሸቸ ኩሸየን ላፑን ጦልንቴተ ኦይቂስ። አ ዶናፕ ናኡ በጋረ ቀረትደ ብሰይ ክዩስ። አ ሰምኦይከ ዎልቀፕ ፖእየ አወ አይፍያ ምለቴስ።

17ታን አ ቤእዶ ዎዴ ሀይቅደባደን ሀነደ፡ አ ቶሁዋ መተን ኩንዳስ። ኩንድን በ ኡሸቸ ኩሸያ ተ ቦል ዎትድ፡ ተነ ሀጋደን ያጌስ፤ «የዮፕ፤ ኮይሮይከ ዉርሴተይከ ተነ። 18ታን ፕጠ ዴእያጋ። ታን ሀይቃስ፤ ሽን ቤአ፡ ሜር ሜርነውከ ፕጠ ዴአይስ። ሀይቁዋ ቁልፕኔ ስኦልያ ቁልፕ ተ ኩሸየን ዴኤስ። 19ስም ኔን ቤእዶባኔ ሀእ ዴእያባ፡ ቀስ ስንተፕ ሀነነባ ጣፈ። 20ኔን ተ ኡሸቸ ኩሸየን ቤእዶ ላፑን ጦልንቴቱ ብርሼተይኔ ቀስ ጦምፕተ ዎትዮ ላፑን ዎርቀ በለቱ ብርሼተይ ሀጋ፤

1:5 መዘ 89:27፤ እስ 55:4 1:6 ኬሳ 19:6፤ አጁ 5:10 1:7 ዳኔ 7:13፤ ዘካ 12:10፤ ማት 24:30፤ መር 13:26፤ ሉቃ 21:27፤ 1ተሰ 4:17፤ ዮሃ 19:34፤ 37
1:8 ኬሳ 3:14፤ አጁ 22:13 1:13 ዳኔ 7:13፤ 10:5 1:14-15 ዳኔ 7:9፤ 10:6
1:15 ሀዘ 1:24፤ 43:2 1:17 እስ 44:6፤ 48:12፤ አጁ 2:8፤ 22:13

ላፑን ጦልንቴት ላፑን ዎሰ ኬተቱ ኪተንቸተ፤ ላፑን ዎርቀ በለት ላፑን ዎሰ ኬተተ።

(1) ኤፍሶንን ዴእየ ዎሰ ኬታ

2 ¹«ኤፍሶንን ዴእየ ዎሰ ኬታ ኪተንቸዮ ሀጋደን ያገደ ጣፈ፤ ለበ ኡሸቸ ኩሸየን ላፑን ጦልንትያ አይቅዳጌ፤ ጦምፔተ ዎትዮ ላፑን ዎርቀ በለቱ ግዱዋረ ሄሜትያጌ፤ ሀጋደን ያጌስ። ²«ታን ኔ አሱዋ፤ ኔ ዳፋራኔ ኔ ጌንጫ ኤረይስ። ቀስ ኔን ኢተ አሰቱባ ጌንጨነው ደንደየቤናጋከ ታን ኤረይስ፤ ዮሱስ ኪትዶጌተ ግዴነን ዴኢድ በንተነ፤ ሩን ዮሱስ ኪትዶጌተ) ግያጌተ ኔን ጦሞሰደ፤ ኤት ዎርደንቸ ግድዮጋ ዴምዶጋከ ኤረይስ። ³ኔን ጌንጨደስ፤ ቀስ ተ ሱንታ ግሸውከ ሜቱዋ ደንደየደስ፤ ዳፋረባከ። ⁴ሽን ታን ኔን ቦርዮብ ዴኤስ፤ አይስ ጊኮ፤ ኔን ከሴ ኔ ሲቁዋ አገደሰ። ⁵ስም ኔን አወፔ ኩንድዳኮኔ አኬከ። ኔ ነገራፔ ስመ፤ ኔን ከሴ አትዮ አሱዋ አተ። ሄጌ ጠይኮ፤ ታን ኔኮ ያነ፤ ያደ ኔን ኔ ነገራፔ ስመነ ጠይኮ፤ ኔን ጦምፕያ ዎትዮ ኔ በላ አ ሱሁዋፔ ኤከርገነ። ⁶ሽን እስባ ሎይተደስ፤ ኒቆላዌቱ አሱዋ፤ ታን እጥዮጋ ኔንከ እጠደሰ።

⁷««ስየነው ሀይት ዴእዮ ኡረይ ጌሽ አያነይ ዎሰ ኬተቱዮ ግዮባ ስዮ፤ ታን ጦንዩ ኡራዮ ጦሳ ገነትየን ሞክየ ዴኦ ምታ አይፍያፔ ማነው እመነ» ያጌስ) ያገደ ጣፈ።

(2) ሰምርኔሰን ዴእየ ዎሰ ኬታ

⁸ «ሰምርኔሰን ዴእየ ዎሰ ኬታ ኪተንቸዮ ሀጋደን ያገደ ጣፈ፤ ሀይቅዳጌ፤ ሀይቁዋፔከ ዴንድዳጌ፤ ኮይሮጌኔ ዉርሴታጌ ሀጋደን ያጌስ።

⁹ ««ታን ኔ ዋይያኔ ኔ ህዩሰቴታ ኤረይስ፤ ሽን ኔን ዱሬ። አይሁደ ግዴነን ዴኢድ በንተነ፤ ሩን አይሁደ) ግያጌት ጨይዮ ጨሻ ታን ኤረይስ፤ ሽን ኤት ሴጣና ማበረን ዴኦሶን። ¹⁰ኔን ዋዩተነ ዋይየው የዮፕ። ቤአ፤ ጠለሄ ሀለቀይ እንቴፔ አመርዳጌተ ጦሞሰነው ቀሾ ኬተን ዩገነ፤ ተሙ ገለሰ ገከናስ እንቴ ዋዩተነ። ሀይቀነ ገከናስከ አመኔትዳጋ ግደ፤ ታን ኔዮ ዴኦ አክሊልያ እመነ።

¹¹ ««ስየነው ሀይት ዴእዮ ኡረይ ጌሽ አያነይ ዎሰ ኬተቱዮ ግዮባ ስዮ፤ ጦንዩ ኡረይ ናአንቶ ሀይቁወን ቆሄቴነ» ያጌስ) ያገደ ጣፈ።

(3) ጴርጋሞነን ዴእየ ዎሰ ኬታ

¹² «ጴርጋሞነን ዴእየ ዎሰ ኬታ ኪተንቸዮ ሀጋደን ያገደ ጣፈ፤ ሩኡ በጋረ ቀረትደ ብሶይ ዴእዮጌ ሀጋደን ያጌስ።

2:7 ዶሜ 2:9፤ ህዝ 28:13፤ አጁ 22:2 2:8 እስ 44:6፤ 48:12፤ አጁ 1:17፤ 22:13
2:11 አጁ 20:14፤ 21:8

13 ««ታን ኔን ዴእዮሳ ኤረይስ። ኔን ሴጣና ከዎታ አራተይ ዴእዮሰን ዴአስ፤ ተ ሱንታ ምንተ ናጋሰ። ሀረይ አቶ፣ ሴጣንይ ዴእዮሰን እንቴ መተን አስ ዎርዶ ታን አመንዮ መርከይ አንትጳስ ዴእዮ ዎዴከ ተነ አመንዮጋ አገባከ። 14 ሽን ታን ኔን ቦርዮ ጉተቦይ ዴኤስ፤ እስራኤል አሰይ ኤቀው የርሽዶ ቁማ ማናዳንኔ ዚተናደን ኤተ ነገረ ኦትስደ ባላቀ ተማርስደ ባላመ ትምርትያ ተማርየ አመርደ አሰት ኔናረ ዴአሶነ። 15 ሄጋደንከ፣ ቀስ ኒቆላዌቱ ትምርትያ ተማርየ አሰት ኔናረ ዴአሶነ። 16 ሄጋ ግሸው፣ ኔን ኔ ነገራፔ ስመ፤ ሄጌ ጠይኮ፣ ታን ኔኮ ኤሱውን ያነ፤ ያደ ሄ አሰቱረ ተ ዶናፔ ክይየ ብሱውን ኦሌተነ።

17 ««ስየነው ሀይት ዴእዮ ኡረይ ጌሽ አያነይ ዎስ ኬተቱዮ ግዮባ ስዮ። ጦንዩ ኡረው ታን ጌመን ዴእየ መናፔ አመርዳጋ እመነ። ቀስ ታን ቦተ ሹቻክ አዮ እመነ፤ ኤክየ ኡራፔ አትን፣ ኦንኔ ኤሬነ ኦረተ ሱንተይ ሄ ሹቻ ቦል ጣፌት ኡቲስ» ያጌስ) ያገደ ጣፈ።

(4) ትያጥርነን ዴእየ ዎስ ኬታ

18 «ትያጥርነን ዴእየ ዎስ ኬታ ኪተንቻዮ ሀጋደን ያገደ ጣፈ፤ ሩጣ ነአይ፣ ተማ ለጩዋ ምለትየ አይፌ ዴእዮጌ፣ ቀስ ጮጭያ ተመን ሴርድ ጳልየ ነሃሴ ግዮ ብረታ ምለትየ ቶሆይ ዴእዮጌ፣ ሀጋደን ያጌስ።

19 ««ታን ኔ አሱዋ፣ ኔ ሲቁዋ፣ ኔ አመኑዋ፣ ኔ ማዱዋኔ ኔ ጌንጫ ኤረይስ፤ ኔን ኮይሮ ኦትዮጋፔ ሀእ ደርሰደ ኦትዮጋ ታን ኤረይስ። 20 ሽን ታን ኔን ቦርዮብ ዴኤስ፤ በነ፣ (ታን ሀነነባ ዮትያሮ) ያግየ መጫስዮ ኤልሃቤሎ አይኔ ጋከ፤ ሄ መጫስያ ተ አሽከረት ዚተናዳንኔ ኤቀው የርሽዶ ቁማ ማናደን፣ ተማርሰውሱኔ በሌተውሱ። 21 አ በ ነገራፔ ስመነ መለ፣ ታን አ ጤለ ቤአስ፤ ሽን ሻረሙጠነው ቃቀትዮጋፔ አ ስመነው ኮየቤይኩ። 22 ቤእቴ፣ ታን አ ሂጠን ኦንግን፣ ሰውን አ ዋዩተነ። ኢረ ሻረሙጥያጌት ሄ ኢረ ኦትዮ ነገራፔ ስመነ ጠይኮ፣ ኤተከ ሀንታረ ዋይየን ዩገነ። 23 ታን እ ናተከ ዎረነ፤ ቀስ ዎስ ኬተ ኡቦይከ ታን አስ ቆፈኔ አሞ ኤርያጋ ግድዮጋ ኤረነ፤ ታን እንቴዮ እንቴ ኦሱዋ መላ እመነ።

24 ««ሽን ትያጥርነን ዴእየ ሀረቶ፣ ሀ ኢተ ትምርትያ ተማርቤናጌቶ፣ ሀረት፣ (ሴጣና ጪሙ ዮሁዋ) ግዮጋ እንቴ ተማርቤኬተ፤ ታን እንቴነ ሀረ ዴጦ ቶስኪ ገይስ። 25 ሽን ታን ያነ ገከናስ እንቴዮ ዴእያባ ምንት ናግቴ። 26-27 ጠንዳጋዮኔ ዉርሴተይ ገከናስ ተ ኦሱዋ ናግዳጋዮ፣ አሰ ዘሬ ኡባ ሃረነ መለ፣ ታን ተ አሞፔ ኤክዶ ማታ መላ አዮ እመነ፤ እ ኤተ ብረተ ዱለን ሃረነኔ ኡርቀ ሚሽ ሚንትዮጋደን ሚንተነ። 28 ቀስ ታን አዮ በካልያ ጦልንትያ እመነ።

29 ««ስየነው ሀይት ዴእዮ ኡረይ ጌሽ አያነይ ዎስ ኬተቱዮ ግዮባ ስዮ» ያጌስ) ያገደ ጣፈ።

2:14 ቆዳ 22:5፣ 7፤ 25:1-3፤ 31:16፤ ዛር 23:4
 2:17 ኪላ 16:14-15፤ 16:33-34፤ እስ 62:2፤ 65:15፤ ዮሃ 6:48-50
 2:20 1ከዎ 16:31፤ 2ከዎ 9:22፣ 30 2:23 መዘ 7:9፤ 62:12፤ ኤርማ 17:10

(5) ሰርዴሰን ዴኒየ ዎስ ኬታ

3¹ «ሰርዴሰን ዴኒየ ዎስ ኬታ ኪተንቸዮ ሀጋደን ያገደ ጣፈ፤ ጦሳ አያነ ላፑነትኔ ላፑን ጦልንቴት ዴኒየጌ ሀጋደን ጌስ።

««ታን ኔ አሱዋ ኤረይስ፤ አስ ኔነ ፐጠ ዴኒሰ ጊኮከ፥ ኔን ሀይቀደሰ። 2ቤጎተ! አትደባኔ ሀይቀነው መትደባ ምንቴተ። አይስ ጊኮ፥ ኔ አሶይ ተ ጦሳ ስንተን ፖሎ ግዴናጋ ታን ዴማስ። 3ስም ኔን ኤክዶባኔ ስይዶባ አኬክ፤ ናገ፤ ኔ ነገራፔክ ስመ። ኔን ቤጎቴነባ ግድኮ፥ ታን ኔኮ ከይሶደን ያነ፤ ታን ዎይሳዴ ያናኮኔ ኔን ኤረከ። 4ሽን በንተ ማዩዋ ኡርቀይቤነ አመርደ አሰት ሰርዴሰን ኔናረ ዴኒሶነ። ኤት ቦተ ማዩዋ ማይድ ተናረ ሄሜተነ፤ አይስ ጊኮ፥ ኤት ቦተ ማዩዋ ማየነው ቤስያጌተ። 5ጦንዳጌ ሄጋደንክ ቦተ ማዩዋ ማየነ። ታን አ ሱንታ ዴኒ መጣፋፔ ቁጭኬ፤ ታን ተ አዋ ስንታንኔ አ ኪተንቸቱ ስንተን እ ተባ ግድዮጋ መርከተነ።

6 ««ስየነው ሀይት ዴኒየ ኡረይ ጌሽ አያነይ ዎስ ኬተቱዮ ግዮባ ስዮ» ያገደ ጣፈ።

(6) ፕላዴልፍየን ዴኒየ ዎስ ኬታ

7 «ፕላዴልፍየን ዴኒየ ዎስ ኬታ ኪተንቸዮ ሀጋደን ያገደ ጣፈ፤ (ዳውተ ቁልፕያ አይቅዳጌ፥ አንኔ ጎርደነው ደንደዮናደን ዶይያጌ፥ ቀስ አንኔ ዶየነው ደንደዮናደን ጎርድያጌ ጌሽይ፥ ቱመንቸይ ሀጋደን ያጌስ።

8 ««ታን ኔ አሱዋ ኤረይስ። ቤአ፥ ታን ኔ ስንተን አንኔ ጎርደነው ደንደዮነ ዶየ ፔንግያ ዎታስ፤ አይስ ጊኮ፥ ኔ ዎልቀይ ጉተ ግድኮከ፥ ተ ቃላ ናገደሰኔ ተ ሱንታክ ኤርኬ ገባከ። 9ቤአ፥ አይሁደ ግድኮነ ሽን በንተነ፥ (ኑን አይሁደ) ጊድ ዎርዶትየ ሴጣነ አይሁደ ዎስ ኬተተ ታን ኤሃደ፥ ኔ ስንተን ጎይንሰነኔ ኔነ ሲቅዮጋክ ኤተ ኤርሰነ። 10ኔን ጌንጨነው ተ አዘዙዋ ናግዶ ግሸው፥ ሰአን ዴኒየ አሳ ፓጨነው ኩሜተ ሰአ ቦል ይየ ዋዬ ዎድያፔ ታንክ ኔነ ናገነ። 11ታን ኤሱውን ያነ፤ አንኔ ኔ አክሊልያ ኤኬነ መለ፥ ኔዮ ዴኒየባ ምንተ አይቀ። 12ታን ጦንየ ኡራ ተ አዋ ቤተ መቅደስየን ቱሰ አተነ፤ እ ሄጋፔ ሙሌክ ክዩነ። ታን ተ ጦሳ ሱንታ፥ ተ ጦሳ ከተማ ሱንታኔ ተ ጦሳ መተፔ ዎደነ አረተ ዮሩሰሳሜ ሱንታ አ ቦል ጣፈነ። ቀስ ታን ተ አረተ ሱንታክ አ ቦል ጣፈነ።

13 ««ስየነው ሀይት ዴኒየ ኡረይ ጌሽ አያነይ ዎስ ኬተቱዮ ግዮባ ስዮ» ያገደ ጣፈ።

3:3 ማት 24:43-44፤ ሉቃ 12:39-40፤ አጁ 16:15
3:5 ኬሳ 32:32-33፤ መዘ 69:28፤ ማት 10:32፤ ሉቃ 12:8፤ አጁ 20:12
3:7 እስ 22:22፤ እዮ 12:14 3:9 እስ 43:4፤ 49:23፤ 60:14
3:12 እስ 62:2፤ 65:15፤ አጁ 21:2

(7) ሎዶቅየን ዴእየ ዎሰ ኬታ

14 «ሎዶቅየን ዴእየ ዎሰ ኬታ ኪተንቻዮ ሀጋደን ያገደ ጣፈ፤
(አመኔትደ ቱመንቸ መርከይ፥ ጦሰይ ሜድዶበው ኮይርይ፥ «አምንእ»
ግዮጌ ሀጋደን ያጌሰ።

15 ««ታን ኔ አሱዋ ኤረይስ። ኔን እርጠ ግደከ፤ ዎይ ምሾ ግደከ፤
እርጠ ዎይ ምሾ ግደርኪሸ። 16 ኔን እርጠ ዎይ ምሾ ግዴነን፥ ቦልአ ግድዮ
ግሸው፥ ታን ኔን ተ ዶናፕ ጨቸነ ሀነይስ። 17 አይስ ጊኮ ኔን፥ (ታን ዱሬ፤
ሜህያሰ፤ ተነ አይኔ ኮሼነ) ያጋሰ። ሽን ኔን ሜቶትዮ አሰ፥ ቀሬትዮ አሰ፥
ህዩሰ፥ ቆቁኔ ከሎትደ አሰ ግድዮጋ ኤረከ። 18 ሄጋ ግሸው፥ ኔን ዱሬተነ
መለ፥ ተመን ጌይደ ዎርቃ፥ ኔን ዮለይየ ኔ ከሎዋ ከመነው ቦተ ማዩዋኔ
ቀስ ሎይተ ጤለነው ኔ አይፍያ ትይዮ ጠልያ ታፕ ሸመናደን፥ ታን ኔን
ዞረይስ። 19 ታን ሲቅዮ አባ ሴረይስኔ ቀጠየይስ፤ ስም ኬህ ምሹተ፤ ኔ
ነገራፔከ ስመ።

20 ««ቤአ፥ ታን ከሬን ኤቀደ ጤሰይስ። አንኔ ታን ጤስዮጋ ስይድ፥
ከርያ ዶይኮ፥ ታን አኮ ጌለነ፤ ጌለደ አረ እስፔ ከሁዋ ማነ፤ እከ ተናረ
እስፔ ማነ። 21 ቀስ ታን ጣነደ ተ አዋረ አ ከዎታ አራተን ኡትዶጋደን፥
ጦንደ አረው ተናረ ተ ከዎታ አራተን ኡትዮ አላፌቴታ እመነ።

22 ««ስይዮ ሀይት ዴእየ አረይ ጌሽ አያነይ ዎሰ ኬተቱዮ ግዮባ ስዮ»
ያጌስ) ያገደ ጣፈ» ያጊስ።

ጦሳ ከዎታ አራታኔ ሰሎውን አሴትዮ ዎሳ ዎጋ

4 1 ሄጋፕ ጉይየን፥ ታን ሰሎውን ዶየ ፔንግያ ቤአስ፤ ቀስ ታዮ
መልከተደን ዮትሸን፥ ታን ስይዶ ኮይር ጨንጉርሰይ ተነ፤ «ሀጋፕ
ጉይየን፥ ሀነው ቤሰያባ ታን ኔን ቤሰነ፤ ሃ ክየ» ያጊስ። 2 ሶሁዋረከ ታን ጌሽ
አያነን አሄተ አጋስ። ቤእቴ፥ ሰሎውን ከዎታ አራተይ ዴኤስ፤ ሄ አራተን
እሶይ አቲስ። 3 ሄ ኡትዳጋ ሜረይ ቡርጨኮ ምለትዮ አልአ ሹቻዳንኔ ዞአ
አልአ ሹቻደን ጳሌስ። ከዎታ አራታዮ አብ በጋረ ምተ ሀይተ ምለትዮ ዙለይ
ዩይ አድድ ዴኤስ። 4 ሄ ከዎታ አራታ ዩይ አድድ፥ ሀረ ላተመኔ አይዱ
ከዎታ አራተት ዴአሶነ፤ ኤተን ቦተ ማዩዋ ማይድ፥ ሁጵየን ዎርቀ አክሊልያ
ዎትደ ላተመኔ አይዱ ጭመት ኡትዶሶነ። 5 ከዎታ አራታፕ ዎልቀንተይ፥
ኮሽንቸይኔ ደዳ ጉንተይ ክዩስ፤ ቀስ ከዎታ አራታ ስንተን ላፕን ጦምፔት
ፖአሶነ። ሄጌት ጦሳ ላፕን አያነተ። 6 ከዎታ አራታ ስንተን ብርሌ ምስትዮ
ቡርጨኮ አበይ ዴኤስ።

ሄ ከዎታ አራታፕ ስንታረኔ ጉዩረ አ መተን ዩይ አድድ፥ አይፌ
ኩምዶ አይዱ ፐጠ ዴእየ ሜሬተት ዴአሶነ። 7 ኮይር ፐጠ ዴእየ ሜሬተይ
ጋሞ ምለቴስ፤ ናአንቶይ ሚዘ መረ ምለቴስ፤ ሄዘንቱዋ ሶምአይ አሰ ሶምአ

3:19 ሌም 3:12፤ እብራ 12:6 4:2-3 ህዝ 1:26-28፤ 10:1
4:5 ኪሳ 19:16፤ ህዝ 1:13፤ ዞካ 4:2፤ አጁ 1:4፤ 8:5፤ 11:19፤ 16:18

ምለቴስ፤ ቀስ አይደንቶይ ፓልየ አርገንተ ምለቴስ።⁸ አይዱ ፐጠ ዴእየ ሜሬተቱዮ ሁጵየን ሁጵየን ኡሱፑን ቄፌ ዴኤስ፤ ኤተው ቦለን ገርሰንከ ኡቦሰን አይፌ ኩሚስ። ኤት ቀምኔ ገለስ።

«ጌሸው፥ ጌሸው፥ ጌሸው፥

ከሴ ዴእያጎ፥ ሀእከ ዴእያጎ፥

ቀስ ስንተፔ ያናጎ፥

ጎደው፥ ኡባፔ ዎልቃመ ጦሰው»

ግዮጋ አጎኮነ።⁹ ሄ ሜሬተት ከዎታ አራተን ኡትደ ሜር ሜርነው

ፐጠ ዴእያጋ መዘሙርየን ሰብዶ ዎዴ፥ ቦንችዶ ዎዴኔ ገለትዶ ዎዴ፥

¹⁰ ላተመኔ አይዱ ጭመት ከዎታ አራተን ኡትደ ሜር ሜርነው ዴእያጋ

ስንተን ጉፈንድ፥ አዮ ጎይኖሶነ፤ ቦንተ አክለሊያ ከዎታ አራታ ስንተን

ዎትድ ሀጋደን ያጎሶነ።

¹¹ «ኑ ጎደው ጦሰው፥ ኔን ቦንቹዋ፥

ሰባኔ ዎልቃ ኤከነው ቤሳሰ፥

አይስ ጊኮ፥ ኡቦባ ኔን ሜደደሰ፤

ቀስ ኡቦበይከ ኔን ኮይዶጋደን

ሀኒስኔ ዴኢስ»

ያጎሶነ።

መጣፋኔ ዶርሳ

5 ¹ እስ ጣተ ዎረቀተይ ከዎታ አራተን ኡትዳገው ኡሸቸ ኩሸየን ዴእያጋ ቤአስ፤ ሄ ጣተ ዎረቀተይ ናኡ ቦጋረከ ጣፌት ኡቲስ፤ ቀስ ላፑን ማተፈይ አ ቦል አተሜቲስ። ² ታን እስ ዎልቃመ ኪተንቸይ ቦ ቃላ ጦቁ አትድ፥ «ማተፋ ፔርድ፥ ጣተ ዎረቀታ ብርሸነው ቤስዮ ኡረይ አኔ?» ያግድ፥ አዋጅያጋ ቤአስ። ³ ሰሉውን ግድን ዎይ ሰአን ግድን፥ ዎይ ሰአፔ ገርሰን ግድን፥ ሄ ጣተ ዎረቀታ ብርሸነው ዎይ አ ግዱዋ ጤለነው አዮኔ ደንደዬትቤነ።

⁴ ጣተ ዎረቀታ ብርሸነው ዎይ አ ግዱዋ ጤለነው ቤስዮ ኡረይ ቦይነ ግሸው፥ ታን ደሮ ዩካስ። ⁵ ጭመቱፔ እሶይ ተነ፥ «ዩኮፕ፤ ቤአ፥ ይሁዳ ዘሬ ግድየ ጋዎይ፥ ዳውተ ዘሬ፥ ማተፋ ፔረነውኔ ጣተ ዎረቀታ ብርሸነው ጦኒስ» ያጊስ።

⁶ ታን ከዎታ አራታፔ፥ ፐጠ ዴእየ አይዱ ሜሬተቱፔኔ ቀስ ጭመቱፔ ግዱወን፥ ሹሄትደ ዶርሰ ምለትድ ኤቅዳጋ ቤአስ፤ አዮ ላፑን ከጨትኔ ላፑን አይፌት ዴአሶነ። ሄኔት ሰአ ኡባ ኪቲትደ ጦሳ ላፑን አያነተ። ⁷ ሄ ዶርሰይ ቢድ፥ ከዎታ አራታ ቦል ኡትዳገው ኡሸቸ ኩሸያፔ ጣተ ዎረቀታ ኤኪስ። ⁸ እ ሄ ጣተ ዎረቀታ ኤክዶ ዎዴ፥ ፐጠ ዴእየ አይዱ ሜሬተትኔ ላተመኔ አይዱ ጭመት አ ስንተን ኩንድዶሶነ። ኤት ሁጵየን

4:6-7 ህዝ 1:22፥ 5-10፥ 10:14 4:8 ህዝ 1:18፥ 10:12፥ እስ 6:2-3
5:1 እስ 29:11፥ ህዝ 2:9-10 5:5 ዶሜ 49:9፥ እስ 11:1፥ 10
5:6 እስ 53:7፥ ዘካ 4:10

ሁጵየን ዲታኔ እጣነይ ኩምዶ ዎርቀ ሚሻ አይቅዶሶን። ሄ እጣነይ ጌሸት ጦሳ ዎስዮጋ።⁹ ኤት፡

«ጣተ ዎረቀታ ኤከነውኔ
ማተፋ ፕረደ ዶየነው ኔዮ ቤሴስ።
አይስ ጊኮ፡ ኔን ሹሄተደሰ።
ኔን ቆሞ ኡባፔ፡
ዱመ ዱመ ቢተ ቃለ ኡባፔ፡
የረ ኡባፔኔ ዘሬ ኡባፔ
ኔ ሱተን ጦሳዮ አሳ ዎዘደሰ።

¹⁰ ኑ ጦሳዮ አተነ መለ፡
ኤተ ኔን ከዎቴተኔ ቄሴተ አተደሰ።
ቀስ ኤት ሰአን ሃረነ»

ያግድ አረተ መዘሙርያ ዬጦሶን።

¹¹ ሄጋፔ ጉይየን፡ ታን ጤለደ፡ ከዎታ አራታ፡ ፐጠ ዴእየ አይዱ ሜሬተተኔ ጭመተ ዩይ አድድ ኤቅደ ደሮ ኪተንቸቱ ጨንጉርሳ ስያስ፤ ኤት ሸአንኔ ሚሎንየን ፐይዴቶሶን። ¹² ሄ ኪተንቸት በንተ ቃላ ጦቄ አትድ፡

«ሹሄትደ ዶርሰይ ዎልቃ፡ ዱሬቴታ፡
አድደ ኤረቴታ፡ ምኖቴታ፡
ቦንቹዎ፡ ሰባ፡
ገለታ ኤከነው ቤሴስ!»

ያግዶሶን።

¹³ ሄጋፔ ጉይየን፡ ሰአን፡ ሰሉወን፡ ሰአፔ ገርሳንኔ አባ ግዶን ዴእየ ሜሬተ ኡባይኔ ቀስ ሄንቱን ዴእየ ሜሬተ ኡባይ፡

«ከዎታ አራታ ቦል
ኡትዳጋዮኔ ዶርሳዮ
ገለተይ፡ ቦንቹይ፡ ሰባይኔ ዎልቀይ
ሜር ሜርነው ግዶ!»

ያግድ ዬጥሸን ስያስ።

¹⁴ ፐጠ ዴእየ አይዱ ሜሬተት፡ «አምንእ» ያግን፡ ጭመት ጉፈንድ ጎይንዶሶን።

ማተፋ ዶዩዎ

6 ¹ ዶርሰይ ላፑን ማተፈቱፔ እሱዎ ዶይሸን ቤአስ፤ ቀስ ፐጠ ዴእየ አይዱ ሜሬተቱፔ እሶይ ደዳ ጉንታ ምለትየ ጨንጉርሰን፡ «ሃ የ!» ያግሸን፡ ታን ስያስ። ² ታን እስ ቦተ ፐራ ቤአስ። ሄ ፐራ ቶግዳጌ ዎንደፍያ አይቂስ፤ ቀስ አዮ አክሊሌ እሜቲስ። አላ እ ጦኒድኔ ቀስከ ጦነው ክዩስ።

5:8 መዘ 141:2 5:9 መዘ 33:3፤ 98:1፤ እስ 42:10 5:10 ኪሳ 19:6፤ አጁ 1:6
5:11 ዳኔ 7:10 6:2 ዘካ 1:8፤ 6:3፤ 6

3 ዶርሰይ ናአንቶ ማተፋ ዶይዶ ዎዴ፥ ፐጠ ዴእየ ሜሬተቱፔ ናአንቶይ፥ «ሃ የ!» ያግሽን፥ ታን ስያስ፥ 4 ቀስ ሀረ ዳመ ፐረይ ክዩስ፥ አሰይ እሶይ እሱዋረ ሹሄተነ መለ፥ ሄ ፐራ ቶግዳጋዮ ሰአን አላ ዴንትዮ ዎልቀይ እሜቲስ፥ ዎገ ብሶይከ አዮ እሜቲስ፥

5 ዶርሰይ ሄዘንቶ ማተፋ ዶይዶ ዎዴ፥ ፐጠ ዴእየ ሜሬተቱፔ ሄዘንቶይ፥ «ሃ የ!» ያግሽን፥ ታን ስያስ፥ ያተደ አመረ ፐረይ ክይዳጋ ቤአስ፤ ቀስ ሄ ፐራ ቶግዳጋ በ ኩሽየን ሜዛና አይቂስ፥ 6 ታን ፐጠ ዴእየ አይዱ ሜሬተቱ ግዶፔ ጩንጉርሰ ምለትያግ ስያስ፥ ሄ ጩንጉርሰይ፥ «እስ ገለሰ አሱዋዮ ደሞዘይ እስ ጉሩሬ ግስቱ፤ ቀስ እስ ገለሰ አሱዋዮ ደሞዘይ ሄዙ ጉሩሬ በንገ፥ ሽን ዘይትያኔ ዎይኔ ኤላ ቆሆፐፐ» ያግሽን ስያስ፥

7 ዶርሰይ አይደንቶ ማተፋ ዶይዶ ዎዴ፥ ፐጠ ዴእየ ሜሬተቱፔ አይደንቶይ፥ «ሃ የ!» ያግሽን፥ ታን ስያስ፥ 8 ታን ወሸላለ ፐረይ ክይዳጋ ቤአስ፥ ሄ ፐራ ቶግዳጋ ሱንተይ ሀይቁዋ፤ አ ጌዱዋ ስአሌ ካለስ፥ ሀይቆይኔ ስአሌ ሰአፔ አይደንቶ ኩሽያ አለን፥ ኮሸን፥ ሀርግየን፥ ዶአን ዎርሰነ መለ፥ ኤተው ማተይ እሜቲስ፥

9 ዶርሰይ እቸሸንቶ ማተፋ ዶይዶ ዎዴ፥ ኤት ጠሳ ቃላ ዮትዶ ግሸውኔ በንተ መርከቲተን አመኔትዶ ግሸው፥ ሹክዶ አሰቱ ሼምፑዋ የርሹዋ የርሹዮሳፔ ገርሰን ቤአስ፥ 10 ኤት በንተ ቃላ ጠቁ አትድ፥ «ኡግ ሃርየ ጎደው፥ ጌሸው፥ ቱመንቸው፥ ሰአን ዴእየ አላ ቦል አውዴ ፕርዱቴ? ቀስ ኑ ሱታ አውዴ አቹቴ?» ያግዶሶነ፥ 11 ኤተዮ ሁጵየን ሁጵየን ቦተ ማዮይ እሜቲስ፥ ኤታጋደንከ ሀይቀነው ቤስየ ኤተ ለጌ አሸከረቱ ፐይዶይኔ ኤተ እሸንቱ ፐይዶይ ኩመነ ገከናስ፥ ኤት አመርደ ዎድያ ተክሸነ መለ፥ ኤተዮ አዴቲስ፥

12 ዶርሰይ አሱፑንተ ማተፋ ዶይዶ ዎዴ፥ ታን ቤአስ፤ ቢተይ ዎልቀፔ ቃጢስ፥ አወ አይፌ ከሬተ ዋሩዋደን ከሬጢስ፤ አግነይከ ኡባረ ሱተ ምለቲስ፥ 13 በለሴ ግዮ ምቴ ቀውኤ አይፌ፥ ዎልቃመ ጨርኮይ ቃትን፥ ሰአን ቆቆፌትዮጋደን፥ ጠልንቴት ሰሉዋፔ ሰአን ቆቆፌትዮሶነ፥ 14 ሰሎይ ጣተ ዎረቀተይ ጣጤትዮጋደን፥ ጣጤትድ ጠይ በዩስ፤ ዴሬ ኡበትኔ ሀሩሮ ኡበት በንተ ሶሁዋፔ ክቾ አግዶሶነ፥ 15 ሄጋፔ ጉይየን፥ ሰአ ከዎት፥ ዴርያ ሃርያጌት፥ ሻለቀት፥ ዱሬት፥ ዎልቃመት፥ ቀስ ሀረ አሰይ ኡበይ፥ አይሌት፥ ጎቀት ዴርያ ክይድ፥ ጎንጎሎ ግዶንኔ ሹቻ ኮፑወን ቆሴትዮሶነ፥ 16 ቆሴትድ ዴሬተኔ ሹቻ፥ «ከዎታ አራተን ኡትዳጋ አይፍያፔኔ ዶርሳ ሀንቁዋፔ ኑ ቦል ኩንድድ፥ ኑነ ጌንቴርኩቲሸ! 17 አይስ ጊኮ፥ ኤተ ግተ ሀንቁዋ ገለሰይ ገኪቺስ፤ ሄ ሀንቁዋ ደንደየይ አኔ?» ያግዶሶነ፥

6:4 ዘካ 1:8፤ 6:2 6:5 ዘካ 6:2፥ 6
6:8 ህዝ 14:21 6:12 እስ 13:10፤ ዩኤ 2:10፥ 31፤ 3:15፤ ማት 24:29፤ መር 13: 24-25፤ ሉቃ 21:25፤ አጁ 11:13፤ 16:18 6:13-14 እስ 34:4 6:14 አጁ 16:20 6:15 እስ 2:19፥ 21 6:16 ሆሴ 10:8፤ ሉቃ 23:30 6:17 ዩኤ 2:11፤ ምላ 3:2

እስራኤል አሳፔ 144,000 አሰቱ ሰምኡውን ማተፈይ ዎዲስ

7 ¹ሄጋፔ ጉይየን፥ ታን አይዱ ኪተንቸት አይዱ ሰአ ዘዝየን ኤቅዳጌተ ቤአስ። ሄ ኪተንቸት ሰአ ቦለን፥ ዎይ አባ ቦለን፥ ዎይ አይ ምተ ቦለን፥ ጨርኮይ ጨርኬናደን ቴቅዶሶን። ²ቀስከ ዴአ ጦሳ ማተፋ አይቅደ ሀረ ኪተንቸይ አወይ ሞክዮሳፔ ክይያጋ ታን ቤአስ። ሄ ኪተንቸይ በ ቃላ ጦቁ አትድ፥ ሰአኔ አባ ቆሀነው ዎልቀይ እሜትዶ አይዱ ኪተንቸተ ጤሲስ። ³ጤስድ፥ «ኑ ጦሳ አሽከረቱ ሰምኡውን ኑን ማተፋ ዎተነ ገከናሽን፥ ሰአ ግድን ዎይ አባ ግድን፥ ዎይ ምተ ግድንከ ቆሆፕፕቴ» ያጊስ።

⁴ታን ጦሳ ማተፋ ሰምኡውን ዎትዶጌቱ ፐይዱዎ ስያስ። እስራኤል ዘሬ ኡባፔ እስ ጤተኔ አይተመኔ አይዱ ሸአ ሰምኡውን ማተፈይ ዎዲስ። ⁵ይሁዳ ዘርያፔ ተመኔ ናኡ ሸአ ሰምኡውን ማተፈይ ዎዲስ። ሮቤለ ዘርያፔ ተመኔ ናኡ ሸአ፥ ጋደ ዘርያፔ ተመኔ ናኡ ሸአ፥ ⁶አሴረ ዘርያፔ ተመኔ ናኡ ሸአ፥ ንፍታሌመ ዘርያፔ ተመኔ ናኡ ሸአ፥ ምናሴ ዘርያፔ ተመኔ ናኡ ሸአ፥ ⁷ስሞነ ዘርያፔ ተመኔ ናኡ ሸአ፥ ሌወ ዘርያፔ ተመኔ ናኡ ሸአ፥ ይሳኮረ ዘርያፔ ተመኔ ናኡ ሸአ፥ ⁸ዛብሎነ ዘርያፔ ተመኔ ናኡ ሸአ፥ ዮሴፈ ዘርያፔ ተመኔ ናኡ ሸአ፥ ብንያመ ዘርያፔ ተመኔ ናኡ ሸአ ሰምኡውን ማተፈይ ዎዲስ።

ቦተ ማዩዋ ማይደ ደሮ አሰተ

⁹ሄጋፔ ጉይየን፥ ዘሬ ኡባፔ፥ ቆሞ ኡባፔ፥ የረ ኡባፔኔ ዱመ ዱመ ቢተ ቃለ ኡባፔ አንኔ ቆደነው ደንደዬነ ዘወይ በይነ ደሮ አሳ ታን ቤአስ። ሄ አሰይ ቦተ ማዩዋ ማይድ፥ ዘምባ ሀይታ በ ኩሽየን አይቅድ፥ ከዎታ አራታ ስንታንኔ ዶርሳ ስንተን ኤቂስ። ¹⁰ኤት በንተ ቃላ ጦቁ አትድ፥ «ኑ አቶቴተይከ ከዎታ አራተን ኡትደ ኑ ጦሳፔኔ ዶርሳፔ ዬስ» ያግዶሶን።

¹¹ኪተንቸት ኡባይ ከዎታ አራታ፥ ጭመተኔ ፐጠ ዴእየ አይዱ ሜሬተተ ዩይ አድድ ኤቅዶሶን። ኤት ከዎታ አራታ ስንተን በንተ ሰምኡውን ጉፈንድ ጦሳዮ ጎይኒድ።

¹² «አምንእ! አንጆይ፥ ቦንቾይ፥ አድደ ኤረቴተይ፥ ገለተይ፥ ሰበይ፥ ዎልቀይ፥ ምኖቴተይ ሜርናፔ ሜርና ገከናስ ኑ ጦሳዮ ግዶ። አምንእ!»

ያግዶሶን።

¹³ጭመቱፔ እሰይ ተነ፥ «ሀ ቦተ ማዩዋ ማይደ አሰት አኔ? ኤት አውፔ ዩዶና?» ያግድ አይቺስ።

14 አይችን ታን፡ «ተ ጎደው፡ ኔን ኤራሰ» ያጋስ።

እ ተነ ሀጋደን ያጊስ፤ «ሀጌት ደሮ ዋይያ ዋይድ ዩዳይተ። ኤት በንተ ማየዋ ዶርሳ ሱተን ሜጭድ በጥስዳይተ። 15 ሄጋ ግሸው፡ ኤት ጦሳ ከዎታ አራታ ስንተን ኤቅድ፡ ቀምኔ ገለስ አ ቤተ መቅደስየን አዮ አቶሶን። ቀስ እ በ ከዎታ አራተን ኡትዳይ ኤተ ግዱወን ደዓኣን። 16 ሀጋፔ ስንተነው መሌከ ኤት ነምሴቶኮነ ዎይ ሳሜቶኮነ። አወይ ኤተ ሜነ፤ ቀስ አይ ምሾይከ ኤተ ጡጌነ። 17 አይስ ጊኮ፡ ከዎታ አራታዮ ግዱወን ኡትደ ዶርሰይ ኤተ ሄመነ። ደዓኣ ሃታ ፑልቱዋኮከ ኤተ ካሌተነ። ጦሰይከ ኤተ አይፍያፔ አፉተ ኡባ ቁጭርገን» ያጊስ።

ላፑንተ ማተፈይ ዶዩቲስ

8 1 ዶርሰይ ላፑንተ ማተፋ ዶይዶ ዎዴ፡ በገ ሳቴ ግድያጋ ኪና ሰሎይ ስርጵ ጊስ።

2 ሄጋፔ ጉይየን፡ ታን ላፑን ኪተንቸተ ጦሳ ስንተን ኤቅያይተ ቤአስ፤ ኤተዮ ላፑን መልከተይ እሜቲስ።

3 እጣና ጨወይዮ ዎርቀ ሚሻ አይቅደ ሀረ ኪተንቸይ ዩድ፡ የርሽዮሳ መተን ኤቂስ። ዎርቃፔ ሜሬትደ የርሽዮሰይ ከዎታ አራታ ስንተን ደዓኤስ፤ ሄ የርሽዮሳ ቦል ጌሽ ኡበቱ ዎሳ ጉጅነ መለ፡ ኪተንቸዮ ደሮ እጣነይ እሜቲስ። 4 እጣና ጨወይ ጌሸቱ ዎሳረ እስፔ ሄ ኪተንቸ ኩሽያፔ ፑዴ ጦሳኮ ቢስ። 5 ሄጋፔ ጉይየን፡ ኪተንቸይ እጣና ጨወይዮጋ ኤክድ፡ የርሽዮሳፔ ተማ ቦንቁዋ ኤክድ፡ አን ኩንቲስ። ኩንትድ፡ ሄ እጣና ጨወይዮጋ ዱጌ ሰአ አልን፡ ደደይ ጡቂስ። ዎልቀንተይ ዎልቀሚስ፤ ቀስ ቢተይከ ቃጢስ።

መልከተት ፑኔትዶሶነ

6 ቀስ ላፑን መልከታ አይቅደ ላፑን ኪተንቸት መልከታ ፑነነው ጊጌትዶሶነ።

7 ኮይሮ ኪተንቸይ በ መልከታ ፑኔስ። ፑንን ሱታረ ወለኬትደ ሸቸይኔ ተመይ ሰአን ቡኪስ። ሰአፔ ሄዘንቶ ኩሼ ጡጌቲስ፤ ምታፔከ ሄዘንቶ ኩሼ ጡጌቲስ፤ ማተ ኡበይከ ጡጌቲስ።

8 ናአንቶ ኪተንቸይከ በ መልከታ ፑኔስ። ዎልቃመ ደሬ ምለትያበይ ተመን ኤጢድ፡ አበን ዩጌቲስ፤ ያትን፡ አባፔ ሄዘንቶ ኩሼ ሱተ ግዲስ። 9 አበን ፐጠ ደዓኣየ ሜሬተቱፔ ሄዘንቶ ኩሼ ሀይቂስ፤ መርከቤቱፔከ ሄዘንቶ ኩሼ ጠዬስ።

10 ሄዘንቶ ኪተንቸይ በ መልከታ ፑኔስ፤ ፑንን ሻፋፔኔ ፑልቶ ሃታፔ ሄዘንቶ ኩሽያ ቦል ሰሎፑፔ ጦምፔደን ኤጥየ ዎልቃመ ጦልንቴ

7:14 ዳኔ 12:1፤ ማት 24:21፤ መር 13:19 7:16 እስ 49:10
7:17 መዘ 23:1፤ 2፤ እስ 49:10፤ 25:8፤ ህዝ 34:23 8:3 ኪሳ 30:1፤ 3፤ አሞ 9:1
8:5 ኪሳ 19:16፤ ዎጋ 16:12፤ ህዝ 10:2፤ አጁ 11:19፤ 16:18
8:7 ኪሳ 9:23-25፤ ህዝ 38:22

ዎዲስ። 11 ሄ ጦልንትያ ሱንተይ ጨሙዋ ጌቴቴስ። ሃታፔ ሄዘንቶ ኩሺ ጨሚስ፤ ቀስ ሃተይ ጨምዶ ግሸው። ደሮ አሰይ ሄ ሃታ ኡይድ ሀይቂስ።

12 አይደንቶ ኪተንቸይ በ መልከታ ፑኒስ። አዋፔ። አግናፔኔ ጦልንትያፔ ሄዘንቶ ኩሺ ዴሺቲስ፤ ኤተ ፖኡዋፔክ ሄዘንቶ ኩሺ ጡሚስ። ሄጋ ግሸው። ገለሳፔ ሄዘንቶ ኩሺ። ቀማፔክ ሄዘንቶ ኩሺ ጡሚስ።

13 እስ አርገንተይ ሰሉዋ ፑዴ ሃክድ ፓልያጋ ታን ቤአስ። ሄ አርገንተይ በ ቃላ ጠቁ አትድ። «ሄዙ ኪተንቸት ፑነን ቤስዮ ህንኮ መልከተይ ፑኔትዮ ዎዴ። ሰአን ዴእየ አሰው አዩአነ! አዩአነ! አዩአነ!» ያግዮጋ ስያስ።

9 1 ሄጋፔ ጉይየን። እቸሸንቶ ኪተንቸይ በ መልከታ ፑኒስ፤ ፑንን ሰሉዋፔ ዱጌ ሰአ ኩንድደ ጦልንትያ ቤአስ። ሄ ጦልንትያዮ ጨመ አላ ቁልፔ እሚቲስ። 2 ጦልንቴ ጨመ አላ ዶዩስ፤ አሆ ጮጭያፔ ክይየ ጩዋ መለ ጩወይ ሄ ጨመ አላፔ ክዩስ። ቀስ አወይኔ ጨርኮይ ሄ ጨመ አላፔ ክይደ ጩወን ጡምዶሶን።

3 ጩዋፔ ሶሌ ዱጌ ሰአ ዩስ። ሰአን ዴእየ ከለመሶቱዮ ዴእየ ዎልቃ መለ ዎልቀይ ቦልየውክ እሚቲስ። 4 ጠሳ ማተፈይ ሶምኡወን በይነ አሰ ጠላላ ቆሀናፔ አትን። ሰአን ዴእየ ማታ ዎይ አጭየ ምተ ግድን ዎይ አይ ምተ ግድንከ ቆሄነ መለ። ቦልየው አዴቲስ። 5 ሶሌ ሄ አላ እቸሹ አግነ ግድያጋ ፐጠ ካአነ መለ። ማተይ እሚትዶጋፔ አትን። አዮ አሰ ዎረነው ማት እሚትቤነ። ከለመሶይ አሰ ዱክድ ሴልስዮጋ ኬና ሶሌ ሴልሴስ። 6 ሄ ገለሰቱን አሰይ ሀይቁዋ ኮየነ፤ ሸን ዴሚነ። ቀስ ሀይቀነውክ አሞተነ፤ ሸን ሀይቆይ አሳፔ በቀተነ።

7 ሶሌ አለው ጊግ ኡትደ ፐረ ምለቴስ። ቦልያ ሁጵየን ዎርቀ ምለትየ አክሊሌ ዴኤስ፤ አ ሶምአይክ አሰ ሶምአ ምለቴስ። 8 አ ብናነይክ መጫሰ ብናና ምለቴስ፤ አ አቸይክ ጋሞ አቸ ምለቴስ። 9 አ ትረይ ብረተን አትዶ ጎንደሌ ምለትያበን ጎኔት ኡቲስ፤ ቀስ አ ቁፍያ ጩንጉርሰይ አላ ባነው ፕሪዮየ ፐረት ጎቸዮ ጋርያ ጩንጉርሳ መለ። 10 አዮ ከለመሶ ጎይነ ምለትየ ጎይነይ ዴኤስ፤ አ ጎይነን ዱክያበይ ዴኤስ። ሄ ጎይነን እቸሹ አግነ ግድያጋ አሰ ቆሀናደን። አዮ ማተይ እሚቲስ። 11 አ ሃርየ ከዎይ ዴኤስ። ሄ ከዎይ ጨመ አላ ኪተንቸ። አ ሱንተይክ እብረይስጤ ቃለን አብዶነ፤ ቀስ ግሪኬ ቃለን አጳልዮነ ጌቴቴስ። አጳልዮነ ግዮገው ብርሼተይ። ጠይስያጋ ግዮጋ።

12 ኮይሮ አዩአነ ግዮጌ አዲስ፤ ቤአ። ብሮን ሀረ ናኡ አዩአነ ግዮጌ ያነ።

8:10 እስ 14:12 8:11 ኤርማ 9:15
8:12 እስ 13:10፣ ህዝ 32:7፣ ዩኤ 2:10፣ 31፣ 3:15 9:2 ዶሚ 19:28
9:3 ኪላ 10:12-15 9:4 ህዝ 9:4 9:6 እዮ 3:21፣ ኤርማ 8:3 9:7 ዩኤ 2:4
9:8 ዩኤ 1:6 9:9 ዩኤ 2:5

13 ኡሱፑንተ ኪተንቸይ በ መልክታ ፑኒስ። ጦሳ ስንተን ኤቅደ፥
 ዎርቃፔ ሜድዶ የርሽዮሰን ዴእየ አይዱ ከጨቱፔ እስ ጨንጉርሳ
 ስያስ። 14 ሄ ጨንጉርሳይ መልክተይ ዴእየ ኡሱፑንተ ኪተንቸ፥
 «ኤፍራጢስ ግዮ ዎገ ሻፈን ቀሼትደ አይዱ ኪተንቸተ ብርሸ» ያጊስ።
 15 ያግን አሰ ዘርያፔ ሄዘንቶ ኩሽያ ዎረነው፥ ሀ ሳትያስ፥ ገለሳስ፥
 አግናስኔ ለይታስ ጊግስ ዎትዶ፥ አይዱ ኪተንቸት ብርሼትዶሶን።
 16 አላ ፐራ ቶግዮ አሳ ፐይዶይ ናኡ ጤቱ ሚሎኔ ግድዮጋ ታን
 ስያስ።

17 ቀስከ ታን አጁተን ፐረተኔ ሄ ፐረተ ቶግደ አሳ ቤአስ። አሳዮ
 ትረን ዎትዮ ብረተ ጎንደሌ መለይ ዴኤስ። ሄ ትረን ዎትዮ ብረተ
 ጎንደሌ መለይ ተመደን ዞአ፤ ሰሉዋ መለ፤ ቀስ ድንያ መለ። ፐረቱ
 ሁጲ ጋዎ ሁጲ መለ። ኤተ ዶናፔ ተመይ፥ ጨወይኔ ድኔ ክዩስ።
 18 ፐረቱ ዶናፔ ክይደ ተመን፥ ጨዋንኔ ድንየን ሀ ሄዙ ሰሸቱን አሰ
 ዘርያፔ ሄዘንቶ ኩሼ ሀይቂስ። 19 አይስ ጊኮ፥ ፐረቱዮ ዎልቀይ ዶናንኔ
 ጎይነን ዴኤስ። ኤተ ጎይነይከ ሁጵያረ ዴእየ ሾሸ ምለቱስ፤ ሄገን ኤት
 አሰ ቆሆሶን።

20 ሀ ሰሸቱን ሀይቂነን አትደ አሰይ በ ኩሽዮን አትደባ አግቤን። ቀስ
 ዎርቃፔ፥ ብራፔ፥ ነሃሴ ግዮ ብረታፔኔ ሹቻፔ አሴትደ፥ ጤለነው ዎይ
 ስየነው ዎይ ሄሜተነው ደንደዮነ ኤቃስኔ ጠለህያስ ጎይንዮጋከ አግቤን።
 21 አሰይ በ ዎርዶጋ፥ ዎይ በ ብትዶጋ፥ ዎይ በ ሻረሙጥዶጋ፥ ዎይ በ
 ዉቅዶጋ አግድ፥ በ ነገራፔ ስምቤን።

ኪተንቸኔ ጉተ መጣፋ

10 1 ቀስከ ታን ሀረ ዎልቃመ ኪተንቸይ ሰሉዋፔ ክይድ፥ ዱጌ
 ዎድዶጋ ቤአስ። ሻራ እ ማይ ኡቲስ፤ ቀስ ዙለይ አ ሁጵያ ዩይ
 አድ ኡቲስ። አ ሶምአይከ አወ መለ፤ አ ቶሆይከ ተመ ቱስ መለ። 2 ሄ
 ኪተንቸይ ዶየ ዴእየ እስ ጉተ ጣተ ዎረቀትዮ በ ኩሽዮን አይቅድ ኡቲስ።
 በ ኡሸቸ ቶሁዋ አባ ቦል ኤስድ፥ በ ሀድርስ ቶሁዋ ቢታ ቦል ኤሲስ።
 3 ኤስድ ጉድየ ጋሙዋደን፥ ዎልቀፔ ጉዲስ። እ ጉድዶጋፔ ጉይየን፥ ላፑን
 ደደት አረ ጉንተን ሃሰይዶሶን።

4 ኤት ጉምዶ ዎዴ ታን ጣፈነው ቆፓስ። ሽን ሰሉዋፔ፥ «ላፑን
 ደደት ሃሰይዶባ አሰው ቃቶፐኔ ጣፎፐፐ» ያግዮ ጨንጉርሳይ ተው
 ስዩቲስ።

5 ሄጋፔ ጉይየን፥ አባ ቦላንኔ ቢታ ቦለን ኤቅዳሸን ታን ቤእዶ
 ኪተንቸይ፥ በ ኡሸቸ ኩሽያ ሰሉዋ ፑዴ ምጨስ። 6 ምጭድ፥ ሰሉዋኔ
 ሰሉውን ዴእየ ኡባባ፥ ሰአኔ ሰአን ዴእየ ኡባባ፥ አባኔ አበን ዴእየ ኡባባ፥
 ሜድደ ሜር ሜርነው ዴእየ ጦሳ ሱንተን ጫቂስ። ያትድ፥ «ዎዴ ዉረነው
 ገምኤን። 7 ሽን ላፑንተ ኪተንቸይ በ መልክታ ፑንዮ ዎዴ፥ ጦሰይ ሀነነባ

የትየ በ አሽከረቱዮ ቃላ የት ዎትዶጋደንከ፥ እ ጡርዶ ጡረይ ፖሌተነ» ያጊስ።

8 ሄጋፔ ጉይየን፥ ሰሉዋፔ ሃሰይሽን ታን ስይዶ ጨንጉርሰይ ናአንቱዋ ዛርድ ተነ፥ «አባ ቦላንኔ ቢታ ቦለን ኤቅደ ኪተንቻ ኩሽየን ዶየ ዴእየ ጣተ ዎረቀትዮ ባደ ኤከ» ያግሽን ስያስ።

9 ታን ሄ ኪተንቻኮ ባደ፥ ጉተ ጣተ ዎረቀትዮ ታዮ እመነ መለ፥ አ አይቻስ፥ እ ተነ፥ «ኤከደ መ፤ ዎረቀትያ ኔ ኡሉዋ ጨሜተነ፤ ሽን ኔ ዶነን ኤሰደን፥ አ መልአነ» ያጊስ።

10 ያግን፥ ታን ኪተንቻ ኩሽያፔ ሄ ጉተ ጣተ ዎረቀትዮ ኤከደ ማስ፤ ተ ዶነን ዎረቀትያ ኤሰደን መልአሱ። ሽን ታን ሚዶጋፔ ጉይየን፥ ተ ኡሎ ግዶይ ጨሚስ። 11 ቀስከ ተነ፥ «የረ ኡባባ፥ ዘሬ ኡባባ፥ ዱመ ዱመ ቢታ ቃላባኔ ከዎቱባ ኔን ሀነነባ ናአንቱዋ ሃሰየነው ቤሴስ» ያጊስ።

ናኡ መርከተ

11 1 ሄጋፔ ጉይየን፥ ሾምቦቆ ምለትየ ልክዮ ጠምአይ ታስ እሜቲስ። እሜትን ተነ ጊዶጌ ሀጋ፤ «ባደ ጦሳ ቤተ መቅደስያኔ የርሽዮሳ ልከ። ሄገን ጎይንያጌተከ ፐይደ። 2 ሽን ቤተ መቅደስየው ከሬ በጋ አገ በየ፤ ሄጋ ልኮፐ። አይስ ጊኮ፥ ሄ ሶሆይ አይሁደ ግዴነ አሰው እሜቲስ። አይሁደ ግዴነ አሰይ ጌሸ ከተማ አይተመኔ ናኡ አግነው ዩደነ። 3 ታን ዋሩዋ ማይደ ተ ናኡ መርከተ ኪተነ፤ ኤት እስ ሸአኔ ናኡ ጤተኔ ኡሱፑን ተሙ ገለሰን ጦሳ ኪታ የተነ» ያጊስ።

4 ሄ ናኡ መርከት ሀ ሰአ ጎዳ ስንተን ኤቅየ ናኡ ዎገረተኔ ጠምፕዶ ዎትዮ ናኡ በለተ። 5 አንኔ ኤተ ቆሀነው ኮይኮ፥ ኤተ ዶናፔ ተመይ ክዬስ፤ ክይድ ኤተ ሞርኬተከ ጠይሴስ። ቀስ አንኔ ኤተ ቆሀነው ኮይኮ፥ ሄጋደንከ ሀይቀነ። 6 ኤት ጦሳ ኪታ የትዮ ዎድየን እረይ ቡኬናደን፥ ሰሉዋ ጎርደነው ኤተዮ ማተይ ዴኤስ። ኤተው ሃታ ሱተ ኪስዮ ማተይከ ዴኤስ፤ ቀስ ኤት በንተነ ኮሽዮ ዎዴ፥ ሰአ ዱመ ዱመ ቦሸን ዴቸነው ኤተዮ ማተይ ዴኤስ።

7 ኤት በንተ መርከቱታ ዉርስዶጋፔ ጉይየን፥ ጨመ አላፔ ፑዴ ክይየ ዶአይ ኤታረ አሌተነ። ሄ ዶአይ ኤተ ጦንድ ዎረነ። 8 ኤተ ጎደይ መስቀልያ ቦለን ምስማርየን ጥሼትድ ከቂትዶ ከተማ ዎገ አግየን ኤተ አሀይ ዝንአነ። ሄ ከተመይ ሌምሱውን ሰዶመ ዎይ ግብጤ ጌቴትድ ጤሴቲስ። 9 ቀስ የረ ኡባፔ፥ ቆሞ ኡባፔ፥ ዱመ ዱመ ቢታ ቃላፔኔ ዘሬ ኡባፔ ዩደ አሰይ ኤተ አሃ ሄዙ ገለሰኔ በጋ ቤአነ። አሀይ ሞጌቴነ መለ፥ ሄ አሰይ ድገነ። 10 ሰአን ዴእየ አሰይ ሀ ሀነነባ የትየ ናኡ አሰቱ

10:5-7 ኪሳ 20:11፤ ዛር 32:40፤ ዳኔ 12:7፤ አሞ 3:7 10:8-10 ህዝ 2:8-3:3
11:1 ህዝ 40:3፤ ዘካ 2:1-2 11:2 ሉቃ 21:24 11:4 ዘካ 4:3፤ 11-14
11:6 ኪሳ 7:17-19፤ 1ሰሜ 4:8፤ 1ከዎ 17:1
11:7 ዳኔ 7:7፤ 21፤ አጁ 13:5-7፤ 17:8 11:8 እስ 1:9-10

ሀይቁወን ኡፈይተነ። አሰይ ኤተ ሀይቁዋ መስቀለደን በንቸነ፤ እሶይ እሱዋዮ እምዮባከ ኪተነ። አይስ ጊኮ። ሰአን ዴእየ አሳ ኤት ደሮ ሜቶይዶሶነ።

11 ሄዙ ገለሳፔኔ በጋፔ ጉይየን። ዴእ አያነይ ጦሳ መተፔ ዩድ። ኤተን ጌሊስ፤ ጌልን ኤት ዴንድ ኤቅዶሶነ። ኤተ ቤእደ ኡብይ ኢተ የሸ የዩስ። 12 ሄጋፔ ጉይየን። ሄ ሀነነባ ዮትየ ናኡ አሰት ሰሉዋፔ። «ሃ ፑዴ ክይቴ» ግየ ዎልቃመ ጩንጉርሳ ስይዶሶነ። በንተ ሞርኬት በንተነ ጤልሽን። ኤት ሻረን ጌልድ። ፑዴ ሰሉዋ ቢዶሶነ።

13 ሄ ሳትየን ቢተይ ዎልቀፔ ቃጢስ፤ ቃጥን ከተማፔ ተመንተ ከሹ ጠዩስ። ቀስ ቢታ ቃተን ላፑን ሸኡ አሰይ ሀይቁስ። ሀይቁነን አትደ አሰይ ኬህ ኮኮር የይድ። ሰሉዋ ጦሳ ግተቴታ ሰቢስ።

14 ናአንቶ አዩአነ ግዮጌ አሲስ። ሽን አኬክቴ፤ ሄዘንቶ አዩአነ ግዮጌ ኤሱወን ያነ።

ላፑንተ መልከታ

15 ሄጋፔ ጉይየን። ላፑንተ ኪተንቸይክ በ መልከታ ፑኒስ። ሰሉወን። «ሰአ ከዎቴተይ ሀእ ኑ ጎዳሰኔ አ ክርስቶሰሰ፤ ቀስ ሜርናፔ ሜርና ገክናስ እ ሃረነ» ያግየ ዎልቃመ ጩንጉርሳይ ስዩቲስ። 16 ስዩትን በንተ አራተን ኡትደ ላተመኔ አይዱ ጭመት ጦሳ ስንተን ዱጌ ጉፈንድ። ጦሳዮ ጎይኒድ ሀጋደን ያግዶሶነ፤

17 «ሀእ ዴእያጎ። ከሴሰፔክ ዴእያጎ።

ጎደው። ኡባፔ ዎልቃመ ጦሰው።

ኔዮ ግተ ዎልቀይ ዴእዮ ግሸውኔ

ኔን ሃረነው ዶምዶ ግሸው።

ኑን ኔነ ገለቶስ።

18 አይሁደ ግዴነ አሰይ ሀንቁቲስ፤

ኔ ሀንቆይክ ገኪስ።

ሀይቅዳጌት ፐርዴትዮ ዎዴ ሀአ፤

ቀስ ኔን ኔ አሽከረቱዮ።

ሀነነባ ዮትያጌቱዮ።

ጌሽቱዮ።

ኔ ሱንተው የይያጌቱዮ።

ጠቀቱዮኔ ዝቀቱዮ

ኤተ አሱዎደን እምዮ ዎዴከ ሀአ።

ሰአ ጠይስያጌተከ

ኔን ጠይስዮ ዎዴ ሀአ»

ያግዶሶነ።

11:11 ህዝ 37:10 11:12 2ከዎ 2:11 11:13 አጁ 6:12፤ 16:18
11:15 ኪሳ 15:18፤ ዳኔ 2:44፤ 7:14፤ 27 11:18 መዘ 2:5፤ 110:5፤ 115:13

19 ሰሎውን ደጋጋፊ ጦሳ ቤተ መቅደሴ ደቡብ፤ አ ቤተ መቅደስን ጦሳ ግቻ ታቦተይ ቤቲስ። ቀስ ዎልቀንተይ ዎልቀሚስ፤ ጉንተይ ሰቡቲስ፤ ደደይ ጡቂስ፤ ቢተይ ቃጢስ፤ ሸቸይክ ሸጪስ።

መጫሰዮኔ ሚምንትያ

12 1ሄጋፔ ጉይየን፥ ሰሎውን ዎልቃመ መላተይ ቤቲስ። አዋ ማይደ እስ ምሽርያ፥ አግና ቦል ኤቅዳረ፥ ተመኔ ናኡ ጦልንቴ አክሊልያ በ ሁጵየን ዎትዳረ ሄገን ደጋአውሱ። 2ሄ ምሽርያ ሸሃረ፤ አ ማሬተይ አይቅድ፥ ሌሶይ ኡንኤትን ዋሳሱ።

3ሀረ እስ ዎልቃመ መላተይ ሰሎውን ቤቲስ። ተሙ ከጭያረ ደጋጋፊ ላፕን ሁጵየን አክሊልያ ዎትደ እስ ግተ ዞአ ሚምንቴ ደጋጋፊ። 4ሄ ሚምንቴ በ ጎይነን ሄዘንቶ ኩሼ ጦልንትያ ሰሎዋፔ ደፍድ፥ ሰአን አሊስ። ሄ ሚምንቴ ዩሌት ዎዶሳረክ ነአ ም በየነው ዩለነ ሀንየ መጫሰ ስንተን ኤቂስ።

5ምሽርያ አቱመ ነአ፥ አይሁደ ግዴነ አሳ ኡባ ብረተ ጠምአን ሃረናጋ ዩላሱ። ሸን ነአይ ጦሳኮኔ አ አራታኮ፥ ፑዴ ኤሱውን ኤሄቲስ። 6ኤሄትን ምሽርያ እስ ሸአኔ ናኡ ጤተኔ ኡሱፑን ተሙ ገለሰው ምዚድኔ ኡሺድ ዎተነው ጦሰይ ጊግስ ዎትደ ሶሁዋ በዙዋ በቀታሱ።

7ሄጋፔ ጉይየን፥ ሰሎውን አለይ ደንዲስ። ምካኤል በ ኪተንቸቱረ እስፔ ሚምንትያረ አሌቲስ፤ ሚምንቴክ በ ኪተንቸቱረ ግድድ፥ ዛሬትድ አሌቲስ። 8ሸን ሚምንቴ ጦኔቲስ። ጦኔትን ሚምንትያስኔ አ ኪተንቸቱስ ሰሎውን ሶሆይ ጠዩስ። 9ግተ ሚምንቴ፥ ጠለሄ ሀለቃ ዎይኮ ሴግና ግዮጌ፥ ቤን ሾሸይ፥ ሰአ ኡባ በሌትያጌ አሌቲስ፤ እ በ ኪተንቸቱረ እስፔ ዱጌ ሰአው አሌቲስ።

10ሄጋፔ ጉይየን፥ ታን ሰሎዋፔ ሀጋደን ያግየ ጨንጉርሳ ስያስ፤ «ጦሳ አቶቴተይ ሀእ ዩስ። ጦሰይ በው ከዎ ግድዮጋደንክ በ ዎልቃ ቤሲስ፤ አ ክርስቶስ በ ማታ ቤሲስ። አይስ ጊኮ፥ ቀምኔ ገለስ ጦሳ ስንተን ኤቅድ፥ ኑ እሸንተ ሞትያጌ ሰሎዋፔ ዱጌ አሌቲስ። 11ኑ እሸንት ዶርሳ ሱታንኔ በንተ ቱሙ መርከቴተን ሚምንትያረ አሌትድ ጦንዶሶነ። ቀስ ኤት በንተ ሼምፑዋ አት እምየገው ቀሬትቦኮነ። 12ሄጋ ግሸው፥ ሰሎውኔ ሰሎ ግድን ደጋጋፊያቶ፥ ኡፊይትቴ። ሸን ሰአውኔ አበው አዩአነ! አይስ ጊኮ፥ ጠለሄ ሀለቃይ ባዮ ጉተ ዎዴ አትዶጋ ኤርዮ ግሸው፥ ዎልቃመ ሀንቁዋረ ዱጌ እንቴኮ ዎዲስ» ያጊስ።

13ቀስ ሚምንቴ በነ ዱጌ ሰአ አልዶጋ በእዶጋፔ ጉይየን፥ ሄ አቱመ ነአ ዩልደ ምሽርዮ ዩዴታ ደሚስ። 14ምሽርዮ ሾሸይ ቆሄነ

11:19 አጁ 8:5፤ 16:18፥ 21 12:3 ዳጌ 7:7 12:4 ዳጌ 8:10
12:5 መዘ 2:9፤ እስ 66:7 12:7 ዳጌ 10:13፥ 21፤ 12:1፤ ይሁ 9
12:9 ዶሜ 3:1፤ ሉቃ 10:18 12:10 እዮ 1:9-11፤ ዞካ 3:1

መለ። ሄዙ ለይታኔ በጋ መይደኔ ኡየይደ አ ናጌትዮሳ በዞ ፓለደ ባነ መለ። ናኡ ዎልቃመ አርገንታ ቁፌ እዮ እሜቲስ።

15ሄጋፔ ጉይየን፣ ምሽርዮ ድአይ ድእድ ኤፋነ መለ። ሾሸይ ሻፋ ሃታ ኬነ ሃታ በ ዶናፔ ምሽሪ ጌዱወን ጉሲስ። 16ሽን ቢተይ ምሽርዮ ማዲስ፤ ቢተይ በ ዶና ዶይድ፣ ሚምንትያ ዶናፔ ክይደ ሃታ ምት አጊስ። 17ሚምንቴ ምሽሪዮ ደሮ ሀንቁቲስ፤ ሀንቁትድ፣ እ ዘሬተ ጦሳ አዘዙዎ ናግዮ ኡበተኔ ዮሱስ ቆንጭስዶ ቱማዮ አመኔትያጌተ አለነው ቢስ። 18ቢድ አባ ዶነን ዴእየ ሸፍየን ኤቂስ።

ናኡ ዶአተ

13 1ሄጋፔ ጉይየን፣ እስ ዶአይ አባፔ ክይሽን፣ ታን ቤአስ። አዮ ተሙ ከጨኔ ሳፑን ሁጴ ዴኤስ፤ አ ተሙ ከጭያ ቦለን ተሙ አክሊሴ ዴኤስ። አ ሁጵየንከ ጨሻ ሱንተይ ጣፌት ኡቲስ። 2ታን ቤእዶ ዶአይ ማሄ ምለቲስ፤ አ ቶሆይ ቤርያ ግዮ ኢተ ዶአ ቶሁዎ ምለቲስ፤ አ ዶነይ ጋሞ ዶነ ምለቲስ። ሚምንቴ በ ዎልቃ፣ በ አራታኔ በ ግተ ማታ ሄ ዶአዮ እሜስ።*



ቤርያ ግዮ ኢተ ዶአ (አጁ 13:2)

3ሄ ዶአ ሁጴቱፔ እሰይ ሀይቅደባ ምለትያጋ ታን ቤአስ፤ ሽን ዎርዮ መሱንተይ ፐጢስ። ሰአ አሰይ ኡበይ ገረሜትድ፣ ሄ ዶአ ጌዱዎ ካሊስ። 4ሚምንቴ በ ማታ ዶአዮ እምዶ ግሸው፣ አሰይ ኡበይ ሚምንትያዮ ጎይኒስ። ቀስ ሄ አሰይ፣ «ዶአ መለይ አኔ? አረ አሌተነው አን ደንደዩ?» ያጊድ፣ ዶአዮ ጎይኒስ።

5ሄ ዶአዮ ፐለ ዮሁዋኔ ጨሻ ሃሰይዮ ዶነይ እሜቲስ። አይተመኔ ናኡ አግናዮ አተነ መለ። አዮ ማተይ እሜቲስ። 6ሄ ዶአይ ጦሳ፣ አ ሱንታ፣ እ ዴእዮሳኔ ሰሉወን ዴእየ ኡበተ ቀንጌታ ዶሚስ። 7ሄ ዶአይ ጌሸቱረ አሌትድ፣ ኤተ ጦነን መለ። አዮ ማተይ እሜቲስ። ቆሞ ኡባ፣ የረ ኡባ፣ ዱመ ዱመ ቢተ ቃለ ኡባኔ ዘሬ ኡባ ሃርዮ ማተይ አዮ እሜቲስ። 8ሰአይ

12:14 ዳኔ 7:25፤ 12:7 13:1 ዳኔ 7:3፤ አጁ 17:3፣ 7-12 13:2 ዳኔ 7:4-6 13:5-6 ዳኔ 7:8፣ 25፤ 11:36

ሚሬተናፕ ከሴ ሹሄትደ ዶርሳ ዴኦ መጣፈን ሱንተይ ጣሬትቤነ አሰይ፡ ሰአን ዴእያጌ ኡብይ፡ ሄ ዶኦሎ ጎይነነ፡

9ሰይየ ሀይት ዴእየ ኡረይ ስዮ፡ 10ኦሞዴተነ አሰ ዴእኮ፡ ኦንኔ ኦሞዴተነ፡ ብሱውን ሹሄተነ አሰ ዴእኮ፡ ኦንኔ ብሱውን ሹሄተነ፡ ጌሹቱ ደንደየይኔ አመኖይ ሀገን ኤሬተነ፡

11ሄጋፔ ጉይየን፡ ሀረ ዶኦይ ሰአፔ ክይያጋ ታን ቤአስ፡ ዶርሰ ከጩ ምለትየ ናኡ ከጩ አዮ ዴኤስ፤ ቀስ ሄ ዶኦይ ሚምንትያደን ሃሰዬስ፡ 12ሄ ዶኦይ ኮይሮ ዶኦ ግተ ማታ ኡባ አ ስንተን ኦቲስ፡ ሰአይኔ ሰአን ዴእየ አሰይ ኡብይ ዎርየ መሱንተይ ፕፕዶ ኮይሮ ዶኦሎ ጎይነነ መለ፡ ሄ ዶኦይ ጎደቲስ፡ 13ሄ ናአንቶ ዶኦይ ግተ መላተተ ኦቲስ፤ ሀረይ አቶ ተማ ሰሉዋፔ አሰ ኡባ ስንት ሰአ ዎተነ ገከናስ መላተተ ኦቲስ፡ 14ኮይሮ ዶኦ ስንተን ኦተነው፡ አዮ እሜትደ መላተቱን ሰአን ዴእየ አሰ ኡባ እ ባሌቲስ፡ ብሱውን መሱንጥኮኔ ፐጠ ዴእየ ኮይሮ ዶኦ ቦንቹውው ምስልያ ጊግሰናደን፡ ሰአ አሰ ኡባየ ናአንቶ ዶኦይ ዮቲስ፡ 15ቀስ ኮይሮ ዶኦ ምስሌ ሃሰየናዳንኔ ባዮ ጎይነነ ኡባ ዎረናደን፡ ናአንቶ ዶኦይ በ ሼምፕዋ ኮይሮ ዶኦ ምስልየን ሼምፕ ጌልሰነው አዘዘቲስ፡

16አሰይ ኡብይ ግተይኔ ጉተይ፡ መንቆይኔ ዱሬ፡ ጎቅኔ አይሌ በ ኡሸቸ ኩሸየን ዎይ በ ሰምኡውን መላታ ዎተናደን፡ ሄ ናአንቶ ዶኦይ ጎደቲስ፡ 17ሄ ዶኦ ሱንተይ ዎይ አ ሱንታ ፕይዶይ ዴእየ መላት በይነ አስ ኦንኔ በይዘነውኔ ሸመነው ደንደዬነ፡

18አድድ ኤረቴተይ ሀገን ዴኤስ፡ ኤረቴተይ ዴእየ ኦንኔ ሄ ዶኦ ፕይዶዎ ብርሼታ ኤሮ፤ አይስ ጊኮ፡ ሄ ፕይዶይ እስ አሰ ሱንታ፡ አ ፕይዶይ ኡሱፑን ጤተኔ ኡሱፑን ተመኔ ኡሱፑን፡

ዶርሳኔ 144,000 አስተ

14 1ሄጋፔ ጉይየን፡ ታን ቤአስ፡ ቤእቲ፡ ዶርሰይ ጥዮኔ ዴርያ ቦል ኤቂስ፡ አ ሱንተይኔ አ አዋ ሱንተይ ሰምኡውን ጣሬትዶ፡ እስ ጤተኔ ኦይተመኔ ኦይዱ ሸኡ አሰት ኦረ እስፔ ዴኦሶነ፡ 2ሰሉዋፔ ክጠ ሃተ ጉንተኔ ደደ ጉንተ ምለትየ ዎልቃመ ጩንጉርሳ ታን ስያስ፡ ቀስ ታን ስይዶ ጩንጉርሰይ ዲታ ዲጥያጌት በንተ ዲታ ዲጥን ስዬትየ ጩንጉርሳ ምለቲስ፡ 3እስ ጤተኔ ኦይተመኔ ኦይዱ ሸኡ አሰት ከዎታ አራታ ስንተን፡ ኦይዱ ፐጠ ዴእየ ሚሬተቱ ስንታንኔ ጭመቱ ስንተን ኤቅዶሶነ፡ ኤቅዶ ሰአፔ ዎዘትደ ኤተፔ አትን፡ ሀረይ ኦንኔ ተማረነው ደንደዬነ ኦረተ መዘሙርያ ዮፕዶሶነ፡ 4ሀጌት ጌሸ አሰተ ግድዮ ግሸው፡ መጫሳረ ገይትድ በንተነ ቱንስቦኮነ፡ ዶርሰይ ብዮሳ ኡባ ኤት ካሎሶነ፡ ኤት ጦሳስኔ ዶርሳስ በይረ ግደነው፡ ሰአ አሰ ግድፔ ዎዘትዳጌተ፡ 5ኤት መሌከ ዎርዶት ኤሮኮነ፤ ኤተን ሞሮይ ባው፡

13:8 መዘ 69:28 13:10 ኤርማ 15:2፤ 43:11 14:1 ህዝ 9:4፤ አጁ 7:3
14:5 ኤፍ 3:13

ጦሳ ፕርዳ ኤርስየ ሄዙ ኪተንቸተ

6 ሰለን ዴእየ አሰ ኡባዮ፥ ዘሬ ኡባዮ፥ ቆሞ ኡባዮ፥ ዱመ ዱመ ቢታ ቃለ ኡባዮኔ የረ ኡባዮ ሜርና ምንጌልያ ምሽራቹዋ አዋጀነው፥ ቦለ ሰሉውን ፓልየ ሀረ ኪተንቸቻ ታን ቤአስ። 7 ሄ ኪተንቸይ በ ቃላ ጦቁ አትድ፥ «ጦሳዮ የይቴ፤ አ ቦንቸቴ። አይስ ጊኮ፥ ሰአ አሰ እ ፕርድዮ ሳቴ ገኪስ። ሰሉዋ፥ ሰአ፥ አባኔ ሃታ ፑልቱዋ ሜድድ ጦሳዮ ጎይንቴ» ያጊስ።

8 ሀረ ናአንቶ ኪተንቸይ፥ «በነ ዚትዮ ዎይኔ ኤሳ አሰ ዘሬ ኡባ ኡሽደ ግተ ባብሎነ ኩንደይቻሱ፤ ኩንደይቻሱ!» ያጊድ፥ ኮይሮ ኪተንቸ ካሊስ።

9 ሄዘንቶ ኪተንቸይ በ ቃላ ጦቁ አትድ፥ ሀጋደን ያጊድ፥ ኮይሮ ናኡ ኪተንቸተ ካሊስ፤ «ዶአዮኔ አ ምስልያዮ ጎይንየ አንኔ ቀስ አ መላታ በ ሰምኡውን ዎይ በ ኩሽየን ዎትየ አንኔ ዴእኮ፥ 10 ጦሰይ በ ዎልቃመ ሀንቁዋ ቡርጨኩውን ኩንትዶ ሀንቁዋ ዎይኔ ኤሳ እ ኡየነ። ሄጋ አትደ ኡባይ ጊሽ ኪተንቸቱ ስንታንኔ ዶርሳ ስንተን፥ ተማንኔ ድንየን ፐጠ ካኤተነ። 11 ኤተ ፐጠ ካእየ ተማ ጨወይ ሜር ሜርነው ጨወተነ። ዶአዮኔ ሄ ዶአ ምስልያዮ ጎይንየ አዮኔ ቀስ ሄ ዶአ ሱንታ መላታረ ዴእየ አዮኔ ቀምኔ ገለስ ሼምፖይ ባወ» ያጊስ።

12 ጦሰው አዘዜትያኔ ዩሱሰዮ አመኔትየ ጊሽት ደንደይዮ ደንደየይ ሀጋነ።

13 ሄጋፔ ጉይየን ሰሉዋፔ፥ «ሀጋ ጣፈ፤ ሀጋፔ ስንተው ጎደን ሀይቅያይት አንጄትዳጌተ» ያግየ ጩንጉርሳ ታን ስያስ።

አያነይ፥ «ቱመ፤ ኤት በንተ ዳፉራፔ ሼምፐነ፤ አይስ ጊኮ፥ ኤተ አሶይ ኤተ ካለነ» ያጌስ።

ጨሃ ዎድያ

14 ቀስከ ታን ቤአስ። ቤእቴ፥ ቦተ ሻረይ ዴኤስ። ሻራ ቦለን አሰ ነአ ምለትያጌ ኡቲስ፤ አ ሁጵየን ዎርቀ አክሊሌ፥ ቀስ አ ኩሽየን ቀረ ባጨይ ዴኤስ። 15 ሀረ ኪተንቸይ ቤተ መቅደስያፔ ክይድ፥ ሻራ ቦለን ኡትዳጋዮ በ ቃላ ጦቁ አትድ፥ «ጨሃ ሳቴ ገክዶ ግሸው፥ ኔ ባጫ ዩደደ ከታ ጨከ፤ አይስ ጊኮ፥ ሰአ ከተይ ሜሊስ» ያጊስ። 16 ያግን ሻራ ቦለን ኡትዳጌ፥ በ ባጫ ሰአ ዩድድ፥ ሰአ ከታ ጨኪስ።

17 ቀስከ ሰሉውን ዴእየ ቤተ መቅደስያፔ ሀረ ኪተንቸይ ክዩስ፤ አዮከ ቀረ ባጨይ ዴኤስ።

18 ተመው አላፌቴተይ ዴእዮ ሀረ ኪተንቸይ የርሽዮሳፔ ክዩስ፤ ክይድ ቀረ ባጨይ ዴእዮ ኪተንቸዮ በ ቃላ ጦቁ አትድ፥ «ዎይንያ አይፌ ቴርዶ ግሸው፥ ኔ ቀረ ባጫ ዩደደ፥ ሰለን ዴእየ ዎይንያ ቱራፔ

14:8 እስ 21:9፤ ኤርማ 51:8፤ አጃ 18:2
14:10 ዶሜ 19:24፤ እስ 51:17፤ ህዝ 38:22 14:11 እስ 34:10 14:14 ዳኔ 7:13
14:15 ዩኤ 3:13

ሞርእያ ቀንጠ!» ያጊስ። 19ሄ ኪተንቸይ በ ባጫ ሰአ ዩድድ፡ ሰአን ዴእየ ዎይንያፕ ሞርእያ ቀንጢስ፤ ቀንጥድ ጦሳ ግተ ሀንቁዋ ሄ ዎይንያ ጉምእዮሰን ዩጊስ። 20ከተማፔ ገጠን ዴእየ ዎይንያ አይፍያ ጉምእዮሰን ዎይንያ አይፌ ጉምኤቲስ። ሱተይ ክይድ፡ ሄ ዎይንያ ጉምእዮሳፕ ሄዙ ጤቱ ክሎ ሜትሬ ኬና ሃክድ፡ ፐረው ፑሉዋ ገክያጋ ኬና ዴልድ ጦቁ ጊስ።

ዉርሴተ ቦሸተ አይቅደ ኪተንቸተ

15 1ታን ሰሉውን ሀረ ግተኔ ገረምስየ መላታ ቤአስ። ጦሳ ሀንቁይ ኤተ ቦለን ፖሌትዮ ግሸው፡ ዉርሴተ ላፑን ቦሻረ ዴእየ ላፑን ኪተንቸት ዴአሶነ።

2ቀስከ ታን ቡርጨኮ አበ ምለትያጋ ተማረ ወለኬትዳጋ ቤአስ። ቀስ ዶአ፡ አ ምስልያኔ አ ሱንታ ቆዳ ጠንዳጌተ ቤአስ። ጦሶይ ኤተዮ እምዶ ዲተተ አይቅድ፡ ቡርጨኮ ምለትየ አባ መተን ኤት ኤቅዶሶነ። 3ኤት ጦሳ አሽከራ ሙሴ መዘሙርያኔ ዶርሳ መዘሙርያ ሀጋደን ዩጥዶሶነ።

- «ጎደው፡ ኡባፔ ዎልቃመ ጦሰው፡
- ኔ አሶይ ግተኔ ገረምስያጋ።
- አሰ ዘሬ ኡባ ከዉወው፡
- ኔ አጌ ጥሎኔ ቱመ።

- 4 ጎደው፡ ኔዮ የዩነይኔ
- ኔ ሱንታ ቦንቹነይ አኔ?
- አይስ ጊኮ፡ ጊሸይ ኔ ጠላላ።
- አሰ ዘሬ ኡባይ ዩድ፡ ኔ ስንተን ጎይነነ፤
- አይስ ጊኮ፡ ኔ ጥሎ አሶይ
- ኡባዮ ቆንጨስ»

ያግድ ዘመሮሶነ።

5ሄጋፔ ጉይየን፡ ታን ሰሉውን ዴእየ ቤተ መቅደሴ ዶዩትዳጋኔ አ ግዶን ዴእየ መርከቱታ ዱንካንያ ቤአስ። 6ላፑን ቦሻረ ዴእየ ላፑን ኪተንቸት ቤተ መቅደስያፔ ክይዶሶነ። ኤት ሊኑዋ ግዮ ክርየን ደዴትደ፡ ጳልድ ቦጥየ ማዩዋ ማይዶሶነ፤ በንተ ትራ ዎርቀ ደንጨውን ዩሽ አትድ ቀችዶሶነ። 7ፐጠ ዴእየ አይዱ ሜሬተቱፔ እሶይ፡ ሜር ሜርነው ገክናስ ዴእየ ጦሳ ሀንቁይ ኩምዶ ላፑን ዎርቀ ኬሬተ ላፑን ኪተንቸቱዮ እሚስ። 8ጦሳ ቦንቹዋፔኔ አ ዎልቃፔ ዩደ ጨወይ ቤተ መቅደስያ ኩሚስ። ላፑን ኪተንቸት ኤሂዶ ላፑን ቦሸት ፖሌተነ ገክናስ፡ ቤተ መቅደስያ አንኔ ጌለነው ደንደይቤነ።

14:20 እስ 63:3፤ ለም 1:15፤ አጁ 19:15 15:3 ኪሳ 15:1
 15:4 መዘ 86:9፤ ኤርማ 10:7 15:5 ኪሳ 38:21
 15:8 ኪሳ 40:34፤ 1ክዎ 8:10-11፤ 2ሀን 5:13-14፤ እስ 6:4

ጦሳ ሀንቆይ ኩምዶ ኬሬተ

16 ¹ሄጋፔ ጉይየን፥ ላፑን ኪተንቸቱየ፥ «ቢድ ጦሳ ሀንቁዋ ላፑን ኬርያፔ ሰአን ጉስቴ» ያግድ፥ ቤተ መቅደስያፔ ሃሰይየ ዎልቃመ ጨንጉርሳ ታን ስያስ።

²ኮይሮ ኪተንቸይ ቢድ፥ በ ኬርየን ዴእያጋ ሰአን ጉሲስ፤ ጉስን ዶአ መላተይ ዴእዮጌቱ ቦልኔ ሄ ዶአ ምስልያዮ ጎይንያጌቱ ቦል ፐለ ሰከየ መሱንተይ ክዩስ።

³ናአንቶ ኪተንቸይ በ ኬርየን ዴእያጋ አበን ጉሲስ፤ ጉስን አባ ሃተይ ሀይቅደ አሰ ሱተ ምለቲስ። ቀስ አበን ዴእየ ሜሬተ ኡቦይከ ሀይቅ ቦዩስ።

⁴ሄዘንቶ ኪተንቸይ በ ኬርየን ዴእያጋ ቫፈቱንኔ ፑልቶቱን ጉሲስ፤ ጉስን ኤት ሱተ ግድዶሶን። ⁵ሃተው ሀለቀትየ ኪተንቸይ ሀጋደን ያግሸን፥ ታን ስያስ፤ «ከሴከ ሀእከ ዴእየ ጎደው፥ ጌሸው፥ ሀ ፐርዳ ፐርድዶ ግሸው፥ ኔን ጥሎ። ⁶ኤት ጌሸቱ ሱታኔ ሀነነባ ዮትያጌቱ ሱታ ጉስዶ ግሸው፥ ኔን ኤተ ኡሸነው ሱታ ኤተው እመደስ። ኤት በንተው ቤስያባ ኤክዶሶን» ያጊስ።

⁷የርሹዋ የርሸዮሳፔ፥ «ጎደው፥ ኡባፔ ዎልቃመ ጦሰው፥ ኔ ፐርደይ ቱመኔ ጥሎ!» ያግየ ጨንጉርሳ ታን ስያስ።

⁸አይደንቶ ኪተንቸይ በ ኬርየን ዴእያጋ አወ አይፍያ ቦለን ጉሲስ፤ ጉስን በ ተማ ምሹውን አሳ ጡገነው፥ አወ አይፍያዮ ማተይ እሜቲስ። ⁹አሰይ ዎልቃመ ምሹውን ጡጌቲስ፤ ጡጌትድ ሀ ቦሸቱ ቦለን ማተይ ዴእዮ ጦሳ ሱንታ ቀንጊስ። ሽን በ ነገራፔ ስምቤነኔ ጦሳ ግተቱታከ ቦንቸቤነ።

¹⁰እቸሸንቶ ኪተንቸይ በ ኬርየን ዴእያጋ ዶአ ከዎታ አራታ ቦል ጉሲስ፤ ጉስን ሄ ዶአ ከዎቱተይ ጡሚስ። አሰይ በ ሴላ ግሸው፥ በ እንጠርሳ ሰኢስ። ¹¹ቀስ አሰይ በ ሴላ ግሸውኔ በ መሱንታ ግሸው ሰሉዋ ጦሳ ቀንጊስ። ሽን በ ኦትዶ ነገራፔ ስምቤነ።

¹²ኡሱፑንተ ኪተንቸይ በ ኬርየን ዴእያጋ ዎገ ኤፍራጢስ ግዮ ቫፈን ጉሲስ፤ ጉስን አርሾ በገፔ ያነ ከዎቱዮ ኦጌ ጊገናደን፥ ሃተይ ሜሊስ። ¹³ሄጋፔ ጉይየን፥ ታን ሾዴ ምለትየ ሄዙ ቱነ አያነት ሚምንትያ ዶናፔ፥ ዶአ ዶናፔኔ ዎርዱዋ ሀነነባ ዮትያጋ ዶናፔ ክይሸን ቤአስ። ¹⁴ኤት ጦሰይ ኦትዮ መላታ ኦትየ ጠለሄቱ አያነተ፥ ሄ ሄዙ ኢተ አያነት ኡባፔ ዎልቃመ ጦሳ ግተ ገለሰን፥ ሰአ ከዎተ ኡባ ኦላዮ ሺሸነው ባነ።

¹⁵«ቤአ፥ ታን ከይሶደን ያነ። አሰ ስንተን ከሎ ሄሜትድ ዩለቴነ መለ፥ ጥስኬንን በ ማየዋ ማይድ ናግየ ኡረይ አንጄትዳጋ!» ያጊስ።

16:2 ኪሳ 9:10 16:4 ኪሳ 7:17-21፤ መዘ 78:44 16:10 ኪሳ 10:21
16:12 እስ 11:15 16:15 ማት 24:43-44፤ ሉቃ 12:39-40፤ አጁ 3:3

16ሄ ኢተ አያነት ከዎተ እብረይሰጤ ቃለን አርመኔዶነ ግዮ ሶሁዋ ሺሽዶሶነ።

17ላፑንተ ኪተንቸይ በ ኪርየን ዴእያጋ ጨርኩውን ጉሲስ፤ ጉስን፥ ቤተ መቅደስየን ዴእየ አራታፕ፥ «ፖሌቲስ» ያግዩ ዎልቃመ ጨንጉርሰይ ዱስ። 18ሄጋፕ ጉይየን፥ ዎልቀንተይ ዎልቀሚስ፤ ጉንተይ ስዩቲስ፤ ደደይከ ጡቂስ፥ ቀስ ቢተይ ፐለ ቃታ ቃጢስ። አስ ሰአን ሜሬቶሰፕፕኪ ቢተይ ሄጋ መለ ቃታ ቃጥ ኤሬነ፤ ሄኔ ኡባፕ አድደ ቃተ። 19ግተ ከተመይ ሄዙ ክይድ ዘኢስ። ቢተ ኡባን ዴእየ ከተመት ጠይዶሶነ። ጦሰይ ግተ ባብሎኖ ቆፕድ፥ በ ኢተ ሀንቁዋ ዎይኔ ኤሰይ ኩምዶ ቡርጨኩዋፕ ዎይኔ ኤሳ ባብሎኖ ኡሺስ። 20ሀሩር ኡባይ ጠዩስ፤ ዴሬከ ቤትቤነ። 21አሰ ቦል እሸተሙ ክሎ ኪና ዴጥዩ ዎልቃመ ሸቸይ ሰሉዋፕ ዎዲስ። አሰይ ሄ ሸቻ ቦሻ ግሸው፥ ጦሳ ቀንጊስ፤ አይስ ጊኮ፥ ቦሸይ ደር ዎልቃመ።

ሻረሙጥዮ ግተ መጫስዮ

17 1ሄጋፕ ጉይየን፥ ላፑን ኪሬት ዴእዮ ላፑን ኪተንቸቱፕ እሰይ ታኮ ዱድ፥ ተነ ሀጋደን ያጊስ፤ «ሃ ዩ፤ ደር ሻፈቱ ለንቅየን ዴእየ ሻረሙጥዮ፥ ግተ ከተምያ፥ ዋነ ቀጠዬትያኮ፥ ታን ኔነ ቤሰነ። 2ሰአን ዴእየ ከዎት ኢረ ሻረሙጥዶሶነ፤ ሰአን ዴእየ አሰይከ አ ሻረሙጥዮ ዎይኔ ኤሳ ኡይድ መቶትዶሶነ» ያጊስ።

3ሄ ኪተንቸይ ተነ ጌሽ አያነን በዞ ኤክ ኤሬስ። ሄገን ታን እስ ምሽርዮ ጨሽ ሱንተይ ቦለ ኡባን ጣፊት ኡትዶ ዞአ ዶአ ቶግዳር ቤአስ፤ ሄ ዶአዮ ላፑን ሁጺኔ ተሙ ከጨ ዴኤስ። 4ሄ ምሽርያ ቱረ አቻ ምለትየ ማዩዋኔ ዞአ ማዩዋ ማያሱ፤ አ ቀስ ዎርቀን፥ ቦንቾ ሹቻንኔ እንቁዋ ግዮ አልአ ሹቻን አሌቁታሱ። አ ሻረሙጥዮ ቱነበይኔ ሽኔይያበይ ኩምዶ ዎርቀ ቡርጨኩዋ በ ኩሸየን አይቃሱ። 5እ ሰምኡውን ጡረ ዮሆ ብርሼተይ ዴእዮ ሱንተይ፥ «ግተ ባብሎኖ፤ ሰአን ዴእየ ሻረሙጠቱዮኔ ሰአን ዴእየ ቱነበው አይዮ» ያግያጌ ጣፊት ኡቲስ። 6ቀስ ሄ ምሽርያ ጌሸቱ ሱታኔ ዩሱሰዮ መርከትሸን ዎርዶጌቱ ሱታ ኡዮደ መቶትዳር ታን ቤአደ ገረሜታስ።

7ኪተንቸይ ተነ፥ «ኔን አይስ ገረሜተዲ? ታን ኔዮ ምሽሬ ጡረ ዮሁዋኔ አ ቶክደ ላፑን ሁጺኔ ተሙ ከጨ ዴእዮ ዶአ ጡረ ዮሁዋ አደነ። 8ኔን ቤእዶ ዶአይ ከሴ ዴኤስ፤ ሽን ሀእ ባወ። ሄ ዶአይ ጨመ አላፕ ክይድ፥ በሸው ባነ። ሰአይ ሜሬቶሰፕ ዶምድ፥ ዴአ መጣፊን ኤተ ሱንተይ ጣፊትቤነ ሰአን ዴእየ አሰይ ዶአ ቤእድ ገረሜተነ። አይስ ጊኮ፥ እ ከሴ ዴኤስ፤ ሀእ ባወ፤ ሽን ስንተፕ ያነ።

16:18 አጁ 8:5፤ 11:13፥ 19 16:19 እስ 51:17 16:20 አጁ 6:14
16:21 ኪሳ 9:23፤ አጁ 11:19 17:1 ኤርማ 51:13 17:2 እስ 23:17፤ ኤርማ 51:7
17:3 አጁ 13:1 17:4 ኤርማ 51:7 17:8 መዘ 69:28፤ ዳኔ 7:7፤ አጁ 11:7

9 «ሀይ አድደ ኤሪቴተኔ አኬከ ኮዬስ። ላፑን ሁጴ ምሽርያ ኡትዮ ላፑን ዴሬተ፤ ሄይት ቀስ ላፑን ከዎተ። 10 ኤተፔ እቸሹ ከዎት ኩንድዶሶነ። እሶይ ሀእ ገከናስከ ሃሬስ፤ ህንኮ ከዎይ ዪችቤነ። እ ዪድ፥ ጉተ ዎድያ ተከነው ቤሴስ። 11 ከሴ ዴእደ ዶአይ፥ ሀእ በይናጌ፥ እ በ ሁጴን ሆስፑንተ ዶአ። እ ላፑን ዶአቱፔ እሱዋ፤ እ ጠየነው ቤስ።

12 «ኔን ቤእዶ ተሙ ከጩት ሃረነው ዶምቤነ ተሙ ከዎተ። ሽን ኤት ዶአረ እስፔ እስ ሳትየው ከዎቱደን ሃረነው ኤተዮ ማተይ እሜተነ። 13 ኤተው ኡበው እስ ቆፈይ ዴኤስ፤ ኤት በንተ ዎልቃኔ በንተ ማታ ዶአዮ እመነ። 14 ኤት ዶርሳረ ላሌተነ፤ ሽን ዶርሰይኔ ዶርሳረ ዴእያጌት፥ እ ጠግዶጌትኔ ዶርዶጌት፥ አ ካልየ አመኔትዳጌት፥ ሄ ከዎተ ጠነ፤ አይስ ጊኮ፥ እ ጎደቱ ጎዳኔ ከዎቱ ከዉዋ» ያጊስ።

15 ኪተንቸይ ቀስከ ተነ ሀጋደን ያጊስ፤ «ሻረሙጥያ ኡትዶ ሄ ኔን ቤእዶ ሃተት የረተ፥ ደሮ አሳ፥ አስ ዘሬተኔ ዱመ ዱመ ቢተ ቃለ። 16 ቀስ ኔን ቤእዶ ተሙ ከጩኔ ዶአይ ሻረሙጥዮ እጠነ። ኤት እዮ ዴእየ ኡበባ ኤክርገነ። ቀስ ኦ ከሎ አሸነኔ እ አሹዋ ምርገነ፤ ያትድ ኤት ኦ ተመን ጡገነ። 17 አይስ ጊኮ፥ ጠሳ ቃለይ ቱመተነ ገከናሽን፥ ኤተ ቆፈይ እሱዋ ግደናደን፥ ኤት በንተ ሃርዮ ዎልቃ ዶአዮ እመናዳንኔ ጠሰይ ቆፕዶጋ ኤት ኦተናደን፥ ኤተ ዎዘነን ጠሰይ አሙዋ ዎቲስ።

18 «ሄ ኔን ቤእዶ ምሽርያ ሰአ ከዎተ ሃርዮ ግተ ከተምዮ» ያጊስ።

ባብሎን ኩንዴታ

18 ¹ሄጋፔ ጉይየን፥ ግተ ማተይ ዴእዮ ሀረ ኪተንቸይ ሰሉዋፔ ዎድሽን፥ ታን ቤአስ፥ ሄ ኪተንቸ ቦንቸይ ሰአ ፖእሲስ።

2 ሄ ኪተንቸይ በ ቃላ ጦቁ አትድ፥ «አ ኩንዳሱ! ግተ ባብሎን ኩንደይቻሱ! ባብሎን ጠለሄት አቅዮ ሶሆ ግዳሱ፤ ኢተ አያነት ኡበትኔ እጥዮ ኢተ ከፎት ኡበት ኢን ዴአሶነ። 3 አይስ ጊኮ፥ አስ ዘሬ ኡባ በ ሻረሙጥዮ ዎልቃመ ዎይኔ ኤሳ ኡሻሱ። ሰአ ከዎት ኢረ ሻረሙጥዶሶነ። እ እሸሎ ዎልቃ ጋሱውን ሰአን ዴእየ ዘልአንቸት ዱሬትዶሶነ» ያጊስ።

4 ሄጋፔ ጉይየን፥ ታን ሰሉዋፔ ሀጋደን ያግየ ሀረ ጩንጉርሳ ስያስ፤ «ተ አሰው፥ እፔ ክይቱ! እ ነገራ ኢረ ኮጠጥቱ! እ ቅጣትያ ሻኮጥቱ። 5 አይስ ጊኮ፥ እ ነገረይ ሰሉዋ ገከነው ዶሬት ኡቲስ። ጠሰይ እ ኢተ ሞሩዋ ሀሰዱስ። 6 አ እምዶጋ ኪና ዛርድ፥ እዮ እምቴ። አ አትዶጋዮ ናኡ ኩሽያ እዮ ቀንጥቱ። አ እንቴዮ ጊግስዶ ኡሻፔ ናኡ ኩሼ መቶይ ኡሻ እ ቡርጩኩዋ ኩንትቴ። 7 አ ቦንቸትዶጋኔ እሸልዶጋ ኪና አ ቱገይቱኔ ከዮይቱ። አ በ ዎዘነን፥ (ታን ከዌደን ኡተይስ፤ ታን አዘን በይነ መጫሰ ግድኪ፤ ቀስ ሙሌከ ከዮትኪ) ያገውሱ። 8 ሄጋ ግሸው፥

17:12 ዳኔ 7:24 18:2 እስ 13:21፤ 21:9፤ ኤርማ 50:39፤ 51:8፤ አጁ 14:8
18:3 እስ 23:17፤ ኤርማ 51:7 18:4 እስ 48:20፤ ኤርማ 50:8፤ 51:6፥ 45
18:5 ዶሜ 18:20-21፤ ኤርማ 51:9 18:6 መዘ 137:8፤ ኤርማ 50:29

እ በሽ ኡብይ ሀርጌ፤ ከዮይኔ ኮሸይ ኦ እስ ገለስ አይቀነ፤ ቀስ አ ተመን ጡጌተነ፤ አይስ ጊኮ፤ እ ቦል ፕርድየ ጦሰይ ዎልቃመ» ያጊስ።

9 ሰአ ከዎት፥ ኢረ ሻረሙጥድ እሸልዳጌት ሄ ከተምያ ጡጌትን፥ ክይየ ጩዋ ቤእዶ ዎዴ፥ ከተሜዮ ኤት ዋሰነኔ ዩከነ። 10 ኤት ሄ ከተሜ ሰሁውው የይዶ ግሸው፥ ሃክ ኤቅድ፥ «ሀ ግተ ከተሜ! ዎልቃመ ከተሜ! ባብሎኔ፥ ኔዮ አዩአነ! ኔን አይ መለ ቱገተኔሸ። ኔን እስ ሳቴ ግዶን ኔ ፕርዳ ኤከደሰ» ያገነ።

11 ኤተ መርከብያ ጫና ሀጋፔ ስንተነው ሸምያብ በይነ ግሸው፥ ሰአን ዴእየ ዘልአንቸት ሄ ከተሜዮ ዋሰነኔ ከዮተነ። 12 ኤተ ዎርቃ፥ ብራ፥ ቦንቾ ሹቻ፥ እንቁዋ ግዮ አልአ ሹቻ፥ ቴረ ኦቸ ምለትየ ማዩዋ፥ ሊኦዋ መለ ማዩዋ፥ ሃርያ ግዮ ማዩዋ፥ ዞአ ማዩዋ፥ ኡብ ቆሞ ሰውየ ምታ፥ ኡብ ቆሙውን ኦትዶ ዛልያ፥ አልአ ምታ፥ ነሃሰያ፥ ብረታ፥ እብነበረድያ ግዮ ሹቻ፥ 13 ቀረፋ፥ ቅመምያ፥ እጣና፥ ክርብያ፥ ትዩትዮ ሸቱዋ፥ ዎይኔ ኤሳ፥ ዘይትያ፥ ሊቅደ ጢልያ፥ ግስትያ፥ ሚዛ፥ ዶርሳ፥ ፐራኔ ፐረይ ጎቾዮ ጋርያ፥ ኤተ አይሌተኔ ሀረይ አቶ አስ ሼምፖኔ ሸምያብ ባወ።

14 ዘልአንቸት ምሽሬዮ፥ «ኔን አሞትዶ ሎኦብይ ኡብይ ኔፔ ሀሊቺስ። ኔ አቆይኔ አሌቄትዮብይ ኡብይ ጠዩቺስ። ኔን ናአንቶ ኤተ ሙሌከ ዴመከ» ያግዶሶነ። 15 ሄ ከተሜን ዘልእድ ዱሬትደ ዘልአንቸት እ ሰሁውው የይድ፥ እፔ ሃክድ ኤቀነ። ኤት ዩከነኔ ከዮተነ።

16 ቀስ፥ «ሊኦዋ ግዮ ክርየን ደዴትደ ማዩዋ፥ ቴረ ኦቸ ምለትየ ማዩዋኔ ዞአ ማዩዋ ማየደ፥ ዎርቀ አሌቁወን፥ ቦንቾ ሹቻንኔ እንቁዋ ግዮ አልአ ሹቻን አሌቄትደ፥ ሄ ግተ ከተሜዮ አዩአነ! 17 ሀጋ ኬነ ግተ አቆ ኡብይ እስ ሳቴ ግዶን እፔ ጠይ አጊስ» ያግዶሶነ።

መርከብያ ላግየ ኡብት፥ መርከብየን ብየ ኡብት፥ መርከብየን ኦትየ ኡብትኔ አበን ኦት ጎኤትየ ኡብት ሃክ ኤቅዶሶነ። 18 ኤቅድ፥ ሄ ከተምያ ጡጌትን ክይየ ጩዋ ቤእዶ ዎዴ በንተ ቃላ ጠቁ ኦትድ፥ «ሀ ግተ ከተምያ ምለትየ ከተም ሙሌከ ባወ» ያግዶሶነ። 19 ኤት በንተ ሁጵየን ቡህያ ቆልድ፥ ዋስዶሶነኔ ከዮትዶሶነ፤ «አበን መርከቤት ዴእዮ ኡባ በ አቁወን ዱሬይደ ግተ ከተሜዮ አዩአነ! ቀስ እዮ ዴእያብይ ኡብይ እስ ሳቴ ግዶን ጠይ ቡዩስ» ያግዶሶነ።

20 ሄ ከተምያ ጠይዶ ግሸው፥ ሰሉውው፥ ኡፈይተ! ጌሸቶ፥ ዩሱስ ኪትዶጌቶ፥ ሀነነባ ዮትያጌቶ፥ ኡፈይትቴ! አይስ ጊኮ፥ አ እንቴነ ኦትዶባ ግሸው ጦሰይ ኦ ፕርዲስ።

18:7-8 እስ 47:7-9 18:9-10 ህዝ 26:16-17 18:11 ህዝ 27:31፥ 36
18:12-13 ህዝ 27:12፥ 13፥ 22 18:15 ህዝ 27:31፥ 36
18:17 እስ 23:14፥ ህዝ 27:26-30 18:18 ህዝ 27:32 18:19 ህዝ 27:30-34
18:20 ዛር 32:43፥ ኤርማ 51:48

21 ሄጋፔ ጉይየን፡፡ ዎልቃመ ኪተንቸይ ዎጠ ምለትየ ግተ ሹቻ ዴንትድ፡፡ አበን አሊስ፡፡ አልድ ሀጋደን ያጊስ፤ «ግተ ከተምያ ባብሎን ሱግን፡፡ ሀጋደን ኩንደነ፤ አ ሀችፔ ስንተነው ሙሌከ ቤቱኩ፡፡ 22 ዲታ ዲጥያጌቱኔ መዘመርያ ዩጥያጌቱ፡፡ ፕላልያኔ መልክታ ፑንያጌቱ ጩንጉርሰይ ሀንፔ ሀን በገን ኔ ግዶን ሙሌከ ስዩቴነ፡፡ ኩሼ ሂሊ ኤርየ አንኔ ናአንቶ ሙሌከ ዴኤነ፡፡ ዎጠ ጩንጉርሰይከ ሀጋፔ ስንተነው ኔ ግዶን ስዩቴነ፡፡ 23 ጠምፕያ ፖአይከ ናአንቱዋ ኔ ግዶን ፖኤነ፡፡ መችያጋ ጩንጉርሰይኔ ቡለሼትያር ጩንጉርሰይ ስንተነው ኔ ግዶን ስዩቴነ፡፡ ኔ ዘልአንቸት ሰአ ኡበን ኤሬትደ ዎልቃመተ፡፡ ኔ ብትዮገን አሰ ዘሬ ኡብይ ጭሜቲስ» ያጊስ፡፡

24 ሀነነባ ዮትያጌቱ ሱተይ፡፡ ጌሸቱ ሱተይኔ ሰአን ዎርዶ ኡብቱ ሱተይ ኢን ቤትዶ ግሸው፡፡ ባብሎን ቀጠዬታሱ፡፡

19 1 ሄጋፔ ጉይየን፡፡ ሰሉውን ደሮ አሳ ዎጨመደን ዎጨምየ ዎልቃመ ጩንጉርሰይ ሀጋደን ያግያጋ ታን ስያስ፤ «ጦሳ ገለተይ ገኩ፡፡ አቶቴተይ፡፡ ቦንቾይኔ ዎልቀይ ኑ ጦሳስ፡፡ 2 አ ፕርደይ ቱመኔ ጥሎ፡፡ ሻረሙጠደ ሰአ ቱንስደ ዎልቃመ ሻረሙጥዮ ጦሳይ ፕርዲስ፤ ጦሳ አሽከረተ አ ዎርዶ ግሸው፡፡ ጦሳይ አ ቀጠዬስ» ያጊስ፡፡ 3 አሰይ ናአንቱዋከ በ ቃላ ጠቁ አትድ፡፡ «ጦሳ ገለተይ ገኩ፡፡ ሄ ከተምያ ሜር ሜርነው ጩውተነ» ያግዶሶነ፡፡

4 ላተመኔ አይዱ ጭመትኔ ፐጠ ዴእየ አይዱ ሜሬተት ከዎታ አራተን ኡትደ ጦሳዮ ጉፈንድ፡፡ «አምንእ፡፡ ጦሳ ገለተይ ገኩ» ያግድ ጎይንዶሶነ፡፡

ዶርሳ ቡለቻዮ ጤስዮ ጤሳ

5 ሄጋፔ ጉይየን፡፡ «ጦሳ አሽከረ ኡብይ፡፡ ጦሳዮ የይየ ጉተይ ግተይ ኡብይ ኑ ጦሳ ገለትቴ» ያግየ ጩንጉርሰይ ከዎታ አራታፔ ክዬስ፡፡

6 ሄጋፔ ጉይየን፡፡ ደሮ አሰደን ዎጨምየ፡፡ ዎልቃመ ሻፈደን ጉምየ፡፡ ዎልቃመ ደዳደን ጡቅየ ጩንጉርሳ ታን ስያስ፡፡ ሄ ጩንጉርሰይ፡፡ «ጦሳ ገለተይ ገኩ፡፡ አይስ ጊኮ፡፡ ኑ ጎደይ፡፡ ኡባፔ ዎልቃመ ጦሳይ ከዎቲስ፡፡ 7 ዶርሳ ቡለቻ ገለሰይ ገክዶ ግሸውኔ ቡለሼትያረከ ቡለቻዮ በነ ጊግስዶ ግሸው፡፡ ኑን ፐሽኩስኔ ኡፈይቶስ፤ ቀስ ዶርሳ ቦንቾስ፡፡ 8 ቡለሼትያርዮ ማየነው ሊኑዋ ግዮ ክርየን ደዴትደ ጰልየ ቦተ ማዮይ እሜቲስ» ያግሸን፡፡ ታን ስያስ፡፡ ሊኑዋ ግዮ ክርየን ደዴትደ ማዮይ ጌሸቱ ጥሎ አሱዋ፡፡

9 ሄጋፔ ጉይየን፡፡ ኪተንቸይ ተነ፡፡ «ዶርሳ ቡለቻዮ ጤሴትዳጌት አንጄትዳጌተ ያገደ ጣፈ» ያጊስ፡፡ ሄ ኪተንቸይ ቀስከ ተነ፡፡ «ሀጌ ጦሳ ቱሙ ቃላ» ያጊስ፡፡

18:22 ህዝ 26:13፤ እስ 24:8 18:22-23 ኤርግ 7:34፤ 25:10
 18:24 ኤርግ 51:49 19:2 ዛር 32:43፤ 2ከዎ 9:7 19:3 እስ 34:10
 19:5 መዘ 115:13 19:6 መዘ 93:1፤ 97:1፤ 99:1፤ ህዝ 1:24 19:9 ማት 22:2-3

10 ያግን ታን አዮ ጎይነው አ ቶሁውን ኩንዳስ። ሸን እ ተነ፥ «ሄጋ አቶፕ፥ ታን ኔ መለኔ ዩሱስ ኤተዮ ቆንጭስዶ ቱመቴታ አይቅደ ኔ እሸንቱ ኡባ መለ አሸከረ፥ ጦሳዮ ጎይነ» ያጊስ።

አይስ ጊኮ፥ ዩሱስ ቆንጭስዶ ቱመቴተይ ሀነነባ ዮትያጌተ ዴንቴትያጋ።

ቦተ ፐራ ቶግዳጋ

11 ያትን፥ ሰሎይ ዶዩትዳጋ ታን ቤአስ። ሄገን ቦተ ፐረይ ዴኤስ፤ ሄ ፐራ ቶግዳጋ አመኔትያጋኔ ቱመንቻ ጊድ ጤጌቱስ። ቶግዳጌ ጥሎቴተን ፐርዴስኔ በ አላከ አሌቱስ። 12 አ አይፌ ተመ ለጮ ምለቱስ፤ ቀስ እ በ ሁጵዮን ደሮ አክሊልያ ምቲስ። አ ቦል ጣፊት ኡትደ ሱንተይ ዴኤስ፤ ሸን ሄ ሱንተይ አይበኮኔ አፔ አትን፥ አንኔ ኤሬነ። 13 እ ማይዶ ማዮይ ሱተን ናቅ ኬስዶጋ። አ ሱንተይከ ጦሳ ቃላ። 14 ሰሎዋ ምታደረት ቦተ ጌሸ ሊኑዋ ግዮ ክርዮን ደዴትደ ማዮዋ ማይድ፥ ቦተ ፐረተ ቶግድ፥ አ ጌዱዋ ካሎሶነ። 15 አሰ ዘሬተ እ ዴቸነ ቀረ ብሰይ አ ዶናፔ ክዩስ። ብረተ ዱለን አሳ እ ሃረነ። ኡባፔ ምልቃመ ጦሳ ሀንቁዋ ኤስይ ቡሌትዮስን ምይኔ አይፍያ እ ጉምአነ። 16 አ ማዮዋ ቦልኔ አ ምድራ ቦል፥ «ከዎቱ ከወዋኔ ጎደቱ ጎዳ» ያግዮ ሱንተይ ጣፊት ኡቲስ።

17 ሄጋፔ ጉይዮን፥ ታን እስ ኪተንቸይ አውን ኤቅዳጋ ቤአስ። ሄ ኪተንቸይ ሰሎውን ጦቅድ ፓልዮ ከፎ ኡቡቱዮ በ ቃላ ጦቁ አትድ፥ «ሃ ዩቱ፥ ጦሳ ከሁዋዮ እስሳ ሺቅቱ። 18 ዩድ ከዎቱ አሹዋ፥ ሻለቀቱ አሹዋኔ ምታደረቱ አሹዋ ሚቱ፤ ፐረቱ አሹዋኔ ፐረተ ቶግዳጌቱ አሹዋከ ሚቱ፤ ቀስ አሰ ኡባ አሹዋ አይልያጋኔ ጎቃጋ፥ ጦቃጋኔ ዝቃጋ ሚቱ» ያጊስ።

19 ፐራ ቶግዳጋረኔ አ ምታደረቱረ አሌተነው፥ ዶአይኔ ሰአ ከምት ቀስ ኤተ ምታደረት እስሳ ሺቅ ኡትዳጌተ ታን ቤአስ። 20 ሄ ዶአይ አ ስንተን ጦሰይ አትዮ መላታ አትደ ምርዱዋ ሀነነባ ዮትያጋረ እስፔ አሄቲስ። ዶአ መላተይ ዴእዮጌተኔ ዶአ ምስልዮው ጎይንዳጌተ እ በሌትዶጌ ሄ አትዮ መላተቱነ። ዶአይኔ ምርዱዋ ሀነነባ ዮትያጌ ናአይከ ድንያረ ኤጥዮ ተመ አበን ፐጠ ዩጌትዶሶነ። 21 ኤተ ምታደረት ፐራ ቶግዳጋ ዶናፔ ክይዮ ብሱውን ሀይቅዶሶነ። ከፎ ኡቡት ኤተ አሹዋፔ በንተው ደንደይዶ ኬና ሚዶሶነ።

ሸኡ ለይተ ከዎቱታ

20 ¹ጪመ አላ ቁልፕያኔ ግተ ሰንሰለታ በ ኩሸዮን አይቅደ እስ ኪተንቸይ ሰሎዋፔ ይያጋ ታን ቤአስ። ²ኪተንቸይ

19:11 መዘ 96:13፤ እስ 11:4፤ ህዝ 1:1 19:12 ዳኔ 10:6
19:15 መዘ 2:9፤ እስ 63:3፤ ዩኤ 3:13፤ አጁ 14:20 19:17-18 ህዝ 39:17-20
19:20 አጁ 13:1-18

ሚምንትያ፡ ሄ ጨገ ሾሻ፣ ጠለሄ ሀለቃ ዎይ ሴጣና ግዮጋ አይቂስ፤ አይቅድ ሸኡ ለይተው ቀቺስ። ³ኪተንቸይ ጨመ አለን አ ዩግድ፡ ሸኡ ለይተይ ዉረናሸን፡ አሰ ዘሬተ ናአንቱዋ በሌቱነ መለ፡ ሄ ጨመ አላ ቁልፕ ጎርድድ አተሚስ። ሄጋፔ ጉይየን፡ ሚምንቱ አመርደ ዎድያ ብርሼተነው ቤሴስ።

4ሄጋፔ ጉይየን፡ ታን አራተተኔ አራተቱን ኡትዳጌተ ቤአስ፤ ኤተዮ ፕርድዮ ማተይ እሜቲስ። ዩሱስ ቆንጭስዶ ቱማኔ ጦሳ ቃላ አዋጅዶ ግሸው፡ በንተ ቆርያ ጎረኤትደ አሰቱ ሼምፑዋዝ ታን ቤአስ። ኤት ዶአዮ ዎይ ዶአ ምስልያዮ ጎይንቦኮነ። ኤት ዶአ መላታ በንተ ሶምኡውን ዎይ በንተ ኩሸየን ዎትቦኮነ። ኤት ሀይቁዋፔ ዴንድድ፡ ክርስቶሳረ እስፔ ከዎቱደን ሸኡ ለይተው ሃርዶሶነ። ⁵ሀይቅዳጌቱፔ አትዳጌት ሸኡ ለይተይ ዉረነ ገከናሸን፡ ሀይቁዋፔ ዴንድቦኮነ። ሄጌ ኮይሮ ዴንዱዋ። ⁶ኮይሮ ዴንዱውን ዴንድዳጌት አንጄትዳጌተኔ ጌሸተ። ኤተ ቦል ናአንቶ ሀይቁወው ዎልቅ ባው። ኤት ጦሳስኔ ክርስቶሰስ ቁሴተ ግደነ፤ ኤት አረ እስፔ ሸኡ ለይተው ሃረነ።

ሴጣይ ጦኔቲስ

7ሸኡ ለይተይ ዉርዶጋፔ ጉይየን፡ ሴጣይ ቀሹዋፔ ብርሼተነ። ⁸እ ሰአን ኡብሰን ዴእየ አሰ ዘሬተ በሌተነው ክየነ፤ ሄጌ ጎገኔ ማጎገ ጌቱትያጋ። ሴጣይ አበ ሸፌ ኬነ ዘሬተ አላዮ ሺሸነ። ⁹ሄ ዘሬት ቢተ ኡባ ማይዶሶነ፤ ማይድ ጌሸቱ ሄራኔ ጦሰይ ሲቅዮ ከተምዮ ዩይ አድ ኤቅዶሶነ። ሸን ተመይ ሰሉዋፔ ዎድድ፡ ኤተ ም አጊስ። ¹⁰ዶአይኔ ዎርዱዋ ሀነነባ ዮትያጌ ዩጌትዶ ድኔኔ ተመ አበን ጠለሄ ሀለቀይ፡ አሰ ዘሬተ በሌትዳጌ፡ ዩጌቲስ። ኤት ቀምኔ ገለስ ሜር ሜርነው ፐጠ ካኤተነ።

ዉርሴተ ፕርዳ

11ሄጋፔ ጉይየን፡ ታን ግተ ቦተ አራታኔ ሄ አራተን ኡትዳጋ ቤአስ። ሰአይኔ ሰሎይ አ ስንተፔ በቀትዶሶነ፤ ናአንቶ ቤትቦኮነ። ¹²ሀይቅዳጌት፡ ግተትኔ ጉተት አራታ ስንተን ኤቅዳጌተ ታን ቤአስ። መጣፈት ዶዩትዶሶነ፤ ሀረ መጣፈይ፡ ዴአ መጣፈይከ ዶዩቲስ። ሀይቅዳጌት በንተ አሱዋደን፡ መጣፈቱን ጣፈት ኡትዳጋደንከ ፕርዴትዶሶነ። ¹³አበይ በ ግዶን ዴእየ ሀይቅዳጌተ እሚስ፤ ሀይቆይኔ ስአሌ በንተ ግዶን ዴእየ ሀይቅዳጌተ እምዶሶነ። ኡብትከ በንተ አሱዋደን ፕርዴትዶሶነ። ¹⁴ሄጋፔ ጉይየን፡ ሀይቆይኔ ስአሌ ተመ አበን ዩጌትዶሶነ። ሄ ተመ አበይ ናአንቶ ሀይቁዋ። ¹⁵ዴአ መጣፈን በ ሱንተይ ጣፈትቤነ አስ አንኔ ተመ አበን ዩጌቲስ።

20:2 ዶሜ 3:1 20:4 ዳኔ 7:9፣ 22 20:8 ህዝ 7:2፣ 38:2፣ 9፣ 15
 20:11-12 ዳኔ 7:9-10

አረተ ሰሎሞን አረተ ሰአ

21 ¹ሄጋፔ ጉይየን፣ ታን አረተ ሰሎሞን አረተ ሰአ ቤአስ። ኮይሮ ሰሎሞን ኮይሮ ሰአይ ጠዬስ። አበይክ ጠዬስ። ²ጌሸ ከተምያ አረተ ዩሩሰላመ፣ በ አዝናዮ ግጦ ጊግደ ቡለሼትየ መጫሴደን፣ ጊገ ኡትዳረ ሰሎሞፔ ጦሳ መተፔ ዱጌ ዎድያሮ ታን ቤአስ።

³ግተ ጩንጉርሰይ አራታፔ ሀጋደን ያግድ፣ ሃሰይሽን፣ ታን ስያስ፤ «ጦሳ ኬተይ አሳረ ዴኤስ፤ ጦሰይ አሳረ እስፔ ዴአነ። ኤት አ አሰ ግደነ፤ ጦሰይ በ ሁጲን ኤታረ ዴአነ። እ ኤተ ጦሳ ግደነ። ⁴ጦሰይ ኤተ አይፍያፔ አፉተ ኡባ ቁጨነ። ሀጋፔ ስንተነው ሀይቆይኔ ከዮይ ዎይ ዋሶይኔ ሰሆይ ዴኤነ። አይስ ጊኮ፣ ጩገበይ ጠዬስ» ያጊስ።

⁵አራተን ኡትዳጌ፣ «ታን ኡባሳ አረጥሰይስ» ያጊስ። ቀስከ ዛሬትድ ተነ፣ «ታን ሃሰይዮጌ አመኔትያጋኔ ቱመ ግድዮ ግሸው ጣፈ» ያጊስ።

⁶ቀስከ ተነ ሀጋደን ያጊስ፤ «ፖሌቲስ። ታን አልፋኔ አሜጋ፤ ዲሜታኔ ፖሎሞ። ሳሜትደ እነኔ ታን ዴኡሞ ሃታ ፑልቱሞፔ ጮ ኡሸነ። ⁷ጦንዮ ኡረይ አንኔ ሀጋ ኡባ ላተነ። ታን አዮ ጦሳ ግደነ፤ እከ ተ ነአ ግደነ።

⁸ሽን የይያጌት፣ አመኔናጌት፣ ቱነት፣ ሼምፖ ዎርያጌት፣ ሻረሙጥያጌት፣ ብትያጌት፣ ኤቀስ ጎይንያጌትኔ ዎርዶትያጌት ኡባይ ዴእዮ ሰሆይ ተመይኔ ድኔ ኤጥዮ አባ ግደነ። ሄጌ ናአንቶ ሀይቆ» ያጊስ።

አረተ ዩሩሰላሞ

⁹ላፑን ዉርሴተ ቦሸት ከምዶ ላፑን ኬሬተ አይቅደ ላፑን ኪተንቸቱፔ እሶይ ታኮ ዩድ ተነ፣ «ሃዮ። ታን ኔነ ቡለሼትያሮ ዶርሳ ኬታይዮ ቤሰነ» ያጊስ። ¹⁰ኪተንቸይ ተነ ደሮ ጦቀ ዴርያ ሁጵያ አያነን ኬሲስ። ኬስድ ጌሸ ከተምያ፣ ዩሩሰላመ ሰሎሞፔ ጦሳ መተፔ ዱጌ ዎድያሮ ተነ ቤሲስ።

¹¹ሄ ከተምያ ጦሳ ቦንቹወን ፖአውሱ። ሄ ከተሜ ፖአይ የሰጲድያ ግዮ አልአ ሹቻ መለ፤ ብርሌደን ጳለውሱ። ¹²ሄ ከተሜዮ ተመኔ ናኡ ፔንጌትኔ ሄ ፔንጌቱን ተመኔ ናኡ ኪተንቸት ናግዮ ዎልቃመ አዱስ ድርሰይ ዴኤስ።

¹³አርሾ በጋረ ሄዙ ፔንጌት ዴአሶነ። ቀስ ቶሆሰ በጋረ ሄዙ ፔንጌትኔ ሁጲሰ በጋረ ሄዙ ፔንጌት ዴአሶነ። አርሳ በጋረከ ሄዙ ፔንጌት ዴአሶነ። ¹⁴ከተሜ ድርሰይ ዶርሰይ ኪትዶ ተመኔ ናኡ ሱንተይ ጣፌትዶ ተመኔ ናኡ ሹቸቱ ቦል ግምቤቲስ።

¹⁵ተናረ ሃሰይደ ኪተንቸዮ ከተምዮ፣ እ ፔንጌቲኔ እ ድርሳ ልክዮ ዎርቀ ገትመይ ዴኤስ። ¹⁶ከተሜዮ አይዱ ዞዜ ዴኤስ፤ ከተሜ ጌሰይኔ ጎምፕይ እስ መለ። ኪተንቸይ ከተምዮ በ ገትመን ልኪስ። ልክን ከተምያ

21:4 እስ 25:8፤ 35:10፤ 65:19 21:6 እስ 55:1
21:7 2ሰሜ 7:14፤ መዘ 89:26-27 21:10 ህዝ 40:2 21:12-13 ህዝ 48:30-35
21:15 ህዝ 40:3

ናኡ ሸአኔ አይዱ ጤቱ ክሎ ሜትሬ ግዳሱ፤ ከተሜ ጌሰይ፣ ጎምፕይኔ ጦቀቱተይ እስ መለ። 17ኪተንቸይ ቀስ ድርሳክ ልኪስ። ልክን፣ አሰ ኩሸየን እስ ጤተኔ አይተመኔ አይዱ ወረ ግዲስ። ሄጌ ኦንኔ ልክዮ ኦግየን ኪተንቸይ ልኪነ።

18ከተሜ ድርሰይ የስጲድያ ግዮ ሹቸን ድሬቲስ። ከተምያ ብርሌደን ጳልየ ጊሽ ዎርቀን አሴታሱ። 19ከተሜ ድርሳዮ ሂጤትደ ሹቸይ ቦንቹትደ ሹቸ ኡቦን አሌቄቲስ፤ ኮይሮ ሂጤትደ ሹቸይ የስጲድያ፣ ናአንት ሰምፔርያ፣ ሄዘንት ኬልቄዶንያ፣ አይደንት በሉረ፣ 20እቸሸንት ሰርዶንክስ፣ ኡሱፑንት ሰርድዮነ፣ ላፑንት ክርስትሎቦ፣ ሆስፑንት ብረሌ፣ ኡዱፉንት ቶጳዝዮንያ፣ ተመንት ክርስጵራስስ፣ ተመኔ እሲንንት ያክንትያ፣ ተመኔ ናአንት አሜቴስጥኖስያ።

21ተመኔ ናኡ ፔንጌት ተመኔ ናኡ እንቁዋ ግዮ አልአ ሹቸ፤ እስ እስ ፔንጌ እስ እንቁወን አሴቲስ። ከተሜ አጌ ብርሌ መለ ጊሽ ዎርቀ።

22ጎደይ፣ ኡባፔ ዎልቃመ ጦሰይኔ ዶርሰይ ከተሜ ቤተ መቅደሴ ግድዮ ግሸው፣ ታን ሄ ከተሜን ቤተ መቅደሴ ቤአቤይኬ። 23ከተሜዮ ፖእየ አው ዎይ አግን ኮሼነ። አይስ ጊኮ፣ ጦሳ ቦንቹይ ሄ ከተሜን ፖኤስ፤ ዶርሰይክ ሄ ከተሜዮ ጦምፔ። 24አሰ ዜሬተይ ከተሜ ፖኡወን ሄሜተነ። ሰአ ከዎትከ ቦንተ ቦንቹዋ ሄ ከተሜኮ ኤሃነ። 25ከተሜ ፔንጌት ኡቦ ገለስክ ዶዮ ዴአነ፤ ሙሌክ ጎርዴቶኮነ። አይስ ጊኮ፣ ሄንን ቀመይ ዴኤነ። 26አሰ ዜሬተ ግተቱተይኔ ቦንቹይ ሄ ከተሜኮ ሸቀነ። 27ሸን ቱነበይ ዎይ ከውሸባ ኦትያጌ፣ ዎይ ዎርዶትያጌ ኦንኔ ሄ ከተምዮ ጌሌነ። ቀስ ዶርሳ ዴአ መጣፈን ሱንተይ ጣፌትዶጌቱ ጠላሳይ ሄ ከተምዮ ጌላነ።

22 1ሄጋፔ ጉይየን፣ ኪተንቸይ ተነ ጦሳ ከዎታ አራታፔኔ ዶርሳ ከዎታ አራታፔ ጎግየ ብርሌደን ጳልየ ዴአ ሃታ ሻፋ ቤሲስ። 2ሄ ሻፈይ ከተማ ኦግያ ግዱዋረ ዱጌ ጎጌስ። ሻፋፔ ሄፍንተ በጋረኔ ሀፍንተ በጋረ ኦግነን እስቶኔ ለይተን ተመኔ ናኡቶ አይፍዮ ዴአ ምተይ ዴኤስ። ሄ ምታ ቦንጮይ ዴእየጌ፣ ዘሬ ኡባ ሀርግያፔ ፐተናስ።

3ሄ ከተመን ቀንጌት አይብኔ ዴኤነ። ጦሳ ከዎታ አራተይኔ ዶርሳ ከዎታ አራተይ ሄ ከተመን ዴአነ። ጦሳ አሸከረት ጦሳዮ ጎይነነ። 4ኤት አ ሶምኡዋ ቤአነ፤ አ ሱንተይ ኤተ ሶምኡወን ጣፌተነ። 5ሄጋፔ ስንተው ሀረ ቀም ዴኤነ። ኤተዮ ጦምፔ ዎይ አወ ፖአ ኮሼነ፤ አይስ ጊኮ፣ ጎደይ ጦሰይ ኤተዮ ጦምፔ ግደነ። ኤት ሜር ሜርነው ከዎተነ።

21:18-21 እስ 54:11-12 21:23 እስ 60:19-20 21:24 እስ 60:3
21:25-26 እስ 60:11 21:27 እስ 52:1፤ ህዝ 44:9 22:1 ህዝ 47:1፤ ዘከ 14:8
22:2 ዶሜ 2:9፤ ህዝ 47:12 22:3 ዘከ 14:11 22:5 እስ 60:19፤ ዳኔ 7:18

ዮሱስ ዩሳ

6 ሄጋ፣ ጉይየን፣ ኪተንቸይ ተነ ሀጋደን ያጊስ፤ «ሀ ታን ሃስይዮጌ ቱመኔ አመኔትያጋ። ሀነነባ ዮትያጌቱዮ በ ጊሽ አያና እምየ ጎደይ ጦሰይ፥ መተን ሀነነው ቤስያባ በ አሽከረተ ቤሰነው በ ኪተንቸ ኪቲስ» ያጊስ።

7 ዮሱስ፥ «ቤአ! ታን መተን ያነ። ሀ መጣፊን ዴእየ ሀነነባ ናግያጌት አንጄትዳጌተ» ያጊስ።

8 ታን ዮሃንስ፥ ሀ ኡበባ ስያስኔ ቤአስ። ታን ሀጋ ስይዶ ዎዴኔ ቤእዶ ዎዴ፥ ሄጋ ተነ ቤስደ ኪተንቸዮ ጎይነነው፥ አ ቶሁውን ኩንዳስ። 9 ሽን ኪተንቸይ ተነ፥ «ሄጋ አቶ። ታን ኔነዳንኔ ሀነነባ ዮትየ ኔ እሸንቱደን፥ ቀስ መጣፊን ዴእያበው አዘዜትየ ኡበቱደን አሸከረ። ጦሳዮ ጎይነ» ያጊስ።

10 ሄጋ፣ ጉይየን፣ ኪተንቸይ ተነ፥ «ሀነ ጊዶ ሀ መጣፋ ቃላ ማተፈን ጎርዶ። አይስ ጊኮ፥ ሀ ኡበበይ ፖሌትዮ ዎዴ መተቲስ። 11 ኢተባ አትያጌ ጉጅድክ ኢተባ አቶ፤ ቱነይ ጉጅድክ ቱዮ። ሎአባ አትያጌ ጉጅድክ ሎአባ አቶ፤ ጊሸይ ጉጅድክ ጊሸ ግዶ» ያጊስ።

12 ዮሱስ፥ «ቤአ! ታን መተን ያነ። አስ ኡበው አ አሱዋደን እመነው፥ ተ ዎይቱዋ ኤክ ያነ። 13 ታን አልፋኔ አሜጋ፤ ኮይሩዋኔ ዉርሴታ፤ ዶሜታኔ ፖሉዋ» ያጊስ።

14 በንተ ማዩዋ ጊሽ ሜጭያጌት አንጄትዳጌተ። ዴአ ምታ አይፍያ ማነውኔ ከተማ ፔንግያረ ጊለነው ኤተዮ ማተይ እሜቲስ። 15 ሽን ከነት፥ ብትያጌት፥ ሻረሙጥያጌት፥ ሼምፑዋ ዎርያጌት፥ ኤቀስ ጎይንያጌትኔ በንተ ሃሰያንኔ በንተ አሱውን ዎርዶትያጌት ከሬረ ዴአሰነ።

16 «ታን ዮሱስ፥ ሀ ዮሁዋ እንቴዮ ዎስ ኬተቱን መርከተነ መለ፥ ተ ኪተንቸ ኪታስ፥ ታን ዳውተ ኬተ ዮሌተ። ታን ፖእስየ ዎንተ በካሌ» ያጊስ።

17 ጊሽ አያነይኔ ቡለሼትያረ፥ «ሃየ» ያጎሰነ። ቀስ ሀጋ ስይየ አንኔ፥ «ሃየ» ያጎ፥ ሳሜትደ አስ አንኔ ሃ ዮ። ዴአ ሃታ ኮይየ አስ አንኔ ጮ ኤኮ።

18 ታን ሀ መጣፊን ጣፌትደ ሀነነ ጊዶ ቃላ ስይየ አነኔ ዞረይስ። አንኔ ሀ ቃላ ቦል እስባ ጉጅኮ፥ ጦሰይ ሀ መጣፊን ጣፌትደ ቦሻ አ ቦል ጉጅነ። 19 አንኔ መጣፊን ዴእየ ሀነነ ጊዶ ቃላ፣ አይበኔ ፕጭስኮ፥ ሀ መጣፋ ግዶን ቆንጭስዶ ዴአ ምታ አይፍያ፣ ጊሽ ከተማ፣ አ ከካየ ሻሁዋ ጦሰይ ፕጭስነ።

20 ሀ ኡበበው መርከትያጌ፥ «ቱመ! ታን መተን ያነ» ያጊስ።

አምንእ። ጎዳ ዮሱሳ፥ ኔን ሃየ።

21 ጎዳ ዮሱስ ክርስቶስ አሮ ኬሀቴተይ እንቴናረ ኡባረ ግዶ። አምንእ።

22:11 ዳኔ 12:10 22:12 መዘ 28:4፤ እስ 40:10፤ 62:11፤ ኤርማ 17:10
22:13 እስ 44:6፤ 48:12፤ አጁ 1:8፥ 17፤ 2:8 22:14 ዶሜ 2:9፤ 3:22
22:16 እስ 11:1፥ 10 22:17 እስ 55:1 22:18-19 ዛር 4:2፤ 12:32